



^ 16  
2798  
18



門 16  
號 2798  
卷 18

黃漳浦集卷三十六

騷

騷章凡九

昭質第一

芳與澤其雜糅兮惟昭質其猶未虧

騫雲漢之昭回兮固散粲以為度  
擊舒讓其脩盈兮又食之以  
顧免世猶訾其不純兮余將安所慕  
哀姬旦之閔殷兮不惠諒  
於同產尼父生而博篤兮世又悲其少  
賤舉二哲以相倣兮固  
猥媚之所惡謂高媿之不倫兮故擔  
擣而不下余剖膺以託藥  
兮洵自濟於犬馬不敢逸於巢  
穴兮亦奚取乎鮫之野既三世  
而皆然兮必余醜之不化咎與譽其  
相根兮鴉鵲共為晝夜彼  
扁石之塊然兮固莫爭其汙媿

黃漳浦集卷三十六 騷

昭和十九年  
三月二十八日  
購求

忍終古第二

懷朕情而不發兮余焉能忍而與此終古

忍與此終古兮道何確而不可忘擣美理以療癥兮亦有濟乎  
厥瘡苟吾軀之已隕兮雖毒痛其亦已矣猶飲息而無害兮冀  
降割之不再霰既狃此枯草兮雷猶憎夫塊木知愛者之信殷  
兮何謗者之已酷耕厯山而肆號兮初猶疑其捐中惘四顧而  
靡逃兮乃寤言其所同凌天地以無畏兮遂表素而體獨循生  
理之攸歸兮乃然疑而不作

淑郵第三

超氛埃以淑郵兮終不反其故都

何所其無氛埃兮遂淑郵而罔患揣星辰之轂擊兮或至搏而  
大散鬼神之駢爭驅兮故逆星而流電微至人之扁心兮不可  
與之程理自三皇而降兮其傳者幾帝窮奇戮而不死兮厥黨  
騰而爲厲世無有明宰兮儼齒髮之相制貳危之猶有餘尸兮  
知丕鼓之不灰積不淑以填虛兮諒無有閔盼賢者還於自然  
兮凶能九死而救敗世何所無氛埃兮宣柴立而靡悔

天式第四

天式縱橫陽離爰死

余不及古之人兮無以玩此天式使軒轅疏附兮世固憇其靜  
逸蛇鳥爲余先後兮世又忮其不直蒼龍爲余奔走兮彼蚪鯁  
而不肯蓐收禦侮兮彼又駮然而自騁帝不存於厥中兮無以  
告於司命斗下夷以挹漿兮遂蕙草而爲柄傷喜樂之無居兮  
徒怒哀以爲廉貞審太乙之孔孤兮訴九五而無與明譬問烏  
之雌雄兮而使鳩爲之定涉江海之茫茫兮固不得其正勝

秉鞭第五

伯昌號衰秉鞭作牧

羣小林於犇狼兮固秉鞭之不易以伯昌之神靈兮猶須牧於九載尺箠分於十夫兮固將逸而肆潰求芻橐於勾芒兮又告余以不戒賜弓矢與斧鉞兮忽化而爲穉穉虎兕立於吾前兮始責余以不退吾固知鼎之將覆兮無與之更載也負鹽車而絕筋兮眾果以驥爲快也

流厥嚴第六

勲闔夢生少離散亡何壯武厲能流厥嚴

美勲闔之流嚴兮知垢賤之自固秉淵志之彌專兮雖靡肯蠶其亦有豎天道憤於揚越兮牛斗之人善怒亦云柔之制剛兮何憊今而踔古哀余生之散離兮世旣罔有君余獨罔有父無

美子兮愁苦

正始昆第七

篤察天隱孤寡存只魂兮歸來正始昆只

吁嗟權輿莫與承兮有始靡昆孰與正兮癡疲執準矇瞶爲之操繩兮夷齊行權微箕守經兮蒼舒造矛伯禹脩城兮跛鼈在前駮耳後乘兮糞彼稻梁雜以冰兮揖讓升堂忽縱橫兮亂我豆籩叢青蠅兮雲門皇皇雜以箏兮南轅適貊吾誰與程兮

近禹磨第八

直羸在位近禹磨只

帝始蹈兮日已藏燎譽衣兮焚堯裳秉禹磨兮安所抗從河伯兮尋舊疆餌蜚蠆兮膏蕭香檣杙成羣兮驅陸梁近禹磨兮安得光垂戈兮羿矢雄狐兮九尾蚩尤旗兮何旖旎雜游兮都市

擁禹麾兮安尋理

掌夢第九

巫陽對曰掌夢上帝其命難從

煌煌神宗告我自勝積精者強有覺無競春容乃聲以俟其定  
勒二十年佩此心鏡太宗不怡垂幃以思執彼鬼中謂吾已知  
三九四七蘿圖歷茲嗟我小臣其何能維赫赫太祖告余江渚  
琅琅雲卿竟舍我去余曰不敢朝廷舍臣非臣敢去臣今欲去  
將安所之天地豁呀岳瀆崩隄人臣視君惟力是視力竭身枯  
則安所濟嗟我小臣既羸以尪何交於天一祖二宗二十五年  
語如鐘鏞召彼故老訊茲掌夢咸曰天命告爾曷用厦屋將顛  
一筵梁棟瓠瓠之鳴曷其有控嗟我老臣實爲此來寤言當心  
雷霆爲開以身許君安逃厥災繫於故官頽仰低回陟降上天

將毋此階丁寔命余則安所懷涕泗滂瀾何能不哀亂曰上帝  
命余何不從兮神明雖幽微以通兮膂力已衰負蒼穹兮去將  
從誰誰適逢兮感我高皇及二宗兮歸死於茲猶禁中兮龍胡  
甦甦迷遺弓兮招我餘魂射高墉兮

續招魂 元三章

號招第一

號魂兮歸來魂尙歸來號來不當悲往不當嬉魂尙歸來號醜  
顧則美遠顧則邇君何樂乎離思魂尙歸來號玉荅旣發菟鬚  
朝歿蜀山之陔顧鏞以撫魂尙歸來號鱗喘彼潭涸而詹詹猿  
狖之癡癡喪彼中林魂尙歸來號棄劍比牘澤陽反鵠耿美一  
人擇不得木魂尙歸來號壑蕙而霰江蘋以風而胡垂老畀以  
蟲蟲魂尙歸來號爾有雁鴻悲不得誤爾有蘭茝紐不得莠或

行千里再迴而阻魂尙歸來號發羽以繳迅而反執匪甘厥鞋  
所求未集魂尙歸來號水則泝流俘彼靈鼈彼烏曷爲三化逾  
烈夫余不足卹而有女之蹙蹙魂尙歸來號莫邪則飛遺彼盤  
根使鴛鴦駟而登彼高聲魂尙歸來號甫生於喬曷困以藜甫  
登於岡曷墜以谿魂尙歸來號或發爾笱以凌爾後魂尙歸來  
號有烏必哺銜蟻四顧不念厥巢遺之中路魂尙歸來號環厥  
箒篲不棄以籜曷以皴瘃而捐其肉嗟子雖貧岍時爲谷魂尙  
歸來號璧則未剖不毀厥鏡明月之育孰斲彼胎魂尙歸來號  
太陰明明死以獲甦怒不再盈過不一成魂尙歸來號魂不歸  
來百里節解魂尙歸來號彼鴉之中林亦懷厥好音子而無良  
不若翔禽魂尙歸來號雖有亂絲一割而理雖有覆盆一發而  
起魂尙歸來號不以霜枯春而不華不以溷塗而焚其車何必

樂居居則余家魂尙歸來號彼鶴之巢爲長水石誰以窺之翺  
翺鶻鶻魂尙歸來號應龍飛天則不得羈覽彼滄溟趨而下孳  
魂尙歸來號如彼青蚨以血塗圍則亦克飛母子遄遄魂尙歸  
來號亦有飄花而膠厥蒂亦有離髮而以爲鬢曷爲一去渺不  
予眎魂尙歸來號或楊而萸或朽而起善不得理以爲帝恥魂  
尙歸來號憐者受肺讐者受齒魂尙歸來號魂不來歸魄不來  
光處闇恒幽蛇龍不章魂尙歸來號德不終晦亦不掩罪靈內  
屏之式訾於外魂尙歸來號螫蟲之踐迪萌草以春弊冕不裂  
以觀後人魂尙歸來號雖有錢鏗不竟厥數或延以時而永於  
千古魂尙歸來號魂不歸來曷曠以棲魂尙歸來號霜雪遞至  
皚若擊澤挾以烈風上下去色魂尙歸來號魂不歸來予母子  
子曷以爲恃魂尙歸來號嗟爾巫咸爲邀厥魂魂兮歸來號

廣招第二

號魂兮曷不歸魂尙歸來號南有燔燂之焦山硫磺熬波沸金  
漫漫其臣回祿雜以長蠻鞭戟蛩蠶而燃桑爲關魂尙歸來號  
東鑿天阱驅駭萬雷魍魎狗馬銜相摧有神吐痰橫數萬里  
黏人而食連弩不避號又有蛟涎觸之則沒吞鮫之魚只若天  
闕商羊以入三年而化其骨魂尙歸來號北有巨塹連冰爲巖  
喫雪之鼠牙毛毳魑醜成羣煮瀚爲鹽鑿人之顛攜以爲函  
魂尙歸來號亦有茂林龍蛇所居冥不見天得人若魚魂尙歸  
來號其西爲陰鼎魔神之府怪獸鬻鬻臨人之戶亦有飛首昏  
而旁午牛鬼蛇精躩不勝數魍壘之徒束結萬首以餌白虎魂  
尙歸來號三危之陰其獸爲獬髮如披篲四角而饕又有鷓鴣  
挾龍而食左鸞右鷓骨酪狼藉魂尙歸來號閩風之下積爲弱

水方壺祖洲素濤嶽崎雖有神人化爲魑夔魂尙歸來號閩浮  
所都金石酷烈獬豸爲御而嗑金鐵出舌盤地迴齒若轍羣帝  
睽睽茹人以血魂尙歸來號魂遄歸來無自罹號天門九扇列  
戟下牙雖無虎豹不得階號其神尙奢金礫火軌邈人以賤齎  
越萬里魂尙歸來號魂遄歸來出戶以咫險若懸水出戶以尺  
若闕不測遄其歸來去無極號下不得鱗上不得翼號中土五  
嶽巖巖不治白日而霾劉落深谿魂尙歸來號宅彼百靈則翼  
而角垣棘畫塹以爲犴獄魂尙歸來號又有孟門太行委羽白  
龍具區雷澤九疑居庸皆隕輕折勁摺膝而齊胸魂尙歸來號  
其外有連臂之帝夜噪崩崖奇稽穿胸銜箸殘尸乳目臍口操  
干而嬉語處非人目不敢覷魂尙歸來號嗟魂歸來號假雲爲  
輿駕以霓虬鼉霆所驅而廓不得哀御彼涼颼土囊爲讐青女

創之汨以浮漚魂尚歸來號蒙汜闕闕要縱不執上冥以窄踐  
履不及魂尚歸來號蟠桃彌千底茲未花櫻杞蓼菡而翳神麻  
魂尚歸來號炮鳳之臙不若烹鳧削草爲脯不若飲匏魂尚歸  
來號雖有霓霞裁不當衣軫鬱結繪雲雷掣之商氣象闕終不  
可處洞壑汨律而迷寒暑魂尚歸來號烏髯紫苓元鳥嗽精菹  
以丹薑而調百鯖朱介翠鏤丹青玉肪馮夷所貢香若杜蘅魂  
尚歸來號又有綠荷薦以元酒碧菜紫苜以錯素藕享彼黔羸  
泰壹先後魂尚歸來號曲室蒙茆伏茨清陰善卷披衣而鳴嶧  
琴雖不克歡亦旣當心魂尚歸來號步不踰庭以耘瑤草樹蘭  
之晦而生火棗雖不萬年亦得所造魂尚歸來號粲廳間溫以  
臨高山履間轟虛剗危躡安望博獵暇左從連連魂尚歸來號  
交襟悅女直水激楚不越跬武而喪遠野魂尚歸來無遠舉號

列荆藉茵斥搏織麗飛赤佐白各倡其志魂所宿處語合望醉  
魂尚歸來無離異號余服不改以質古昔遂取近沓樂獲其極  
敬而不局好無斃號魂尚歸來好不若兄弟號清觴旣舉遠就  
道號利劍潔脩佩纓潔馨合所作號魂尚歸來合不若妻子號  
嗚嗚以調釋怨喪怪屬屬之與不能而備約出以入剛外而懿  
丙魂尚歸來號魂尚歸來人生之樂驅而迫人玉虎盤躡繡以  
麒麟集彼日月而揚清塵魂尚歸來號華不可久而營不弭縮  
氣約體與帝者理魂尚歸來號固名永窮體嗇而宏服調以內  
娛維所擇號時不得避善不得翳履之章章爲眾地號魂尚歸  
來無甘遠棄號聲名如日曷不利號乃役列星執璇帝庭舞獸  
翔鸞震霆不驚佐魂以游而百物咸宣魂尚歸來號嗟魂之廬  
蟪蛄當戶省彼四方韞不可赴妻子之邦以爲樂土魂尚歸來



號

禮魂第三

陰以風兮天晦晦將靈車兮不得屆波生兮江中路幽兮山外  
靈約詞兮曷從再雲披披兮雨下來棘變變兮生車衣濡足兮  
創肌予從靈兮方何期靈之來兮日蓋暮陰不開兮天益下蟲  
號兮啾啾逐嘈嘈兮不得語裂余衣兮江上棧渡深兮涉淺望  
夫君兮不一反靈語兮坳堂蒹草生兮雜以菖迥微風兮聲不  
揚靈迴車兮迅前速峻臨淵兮不得度君思余兮粟以飄余思  
君兮然疑作施者固兮往者輕冰高兮水薄靈來重兮耿余思  
汰以哀兮吹參差魚鱗鱗兮鳥下舞蹇薜蘿兮葺君所靈不安  
兮倏焉離余亦將兮離居山崒崒兮泉漑漑白石生兮闕余室  
靈從左兮間余右路差池兮曷同宿衝風至今百草衰蛟龍藏

兮君焉依來長楸兮顧余馬靈襄襄兮擊余鼓佩不同兮繡則  
均思不一兮各及春桑庚飛兮鳴鴉鳴冰洩洩兮水渙渙楫櫂  
兮蘭舟與君期兮河中流靈之來兮前颺颺余從駕兮乘文鷺  
荷生兮蕙穗不及衣兮猶得佩靈中疑兮適則阻日皓皓兮間  
微雨語雖曠兮猶所親室雖曠兮猶匪野折芳草兮蹇辛夷思  
繁兮草稀蔓子生兮何萋萋猿狖嘯兮日昧昧霜未降兮露先  
戒陳琴瑟兮離以歌靈不來兮傷如何

續離騷凡二章

離疚上

黃子曰道周少負節不合於俗十年於世動見棄擯窮不能  
治蔬絮以憂其親每負米數千里外必為風雨疾病之所摧  
折鄉里之人至目為放浪之士益輕其親羅網縉弋幾於上

下既處濁世僻遠海外不足有明於是其父悲鬱惓惓負奇  
以死道周時年二十有二不能自具殯斂又竄於荒崖窮谷  
之間無戚屬知故之助嗟哉已矣古賢士失時窮止其身辱  
不逮親以視道周何如者屈原力不及宗哀懷客死故懷沙  
沈汨以殉其君嗟乎巖穴君不若父道周今日誼不得死乎  
子止祇不嘗藥伏劍而死世猶罪之聖人有作又何所置我  
也魯有男子爲風木之哀者苴服號哭告於孔氏投河而死  
此以眎湘纍又爲何如者哉仲由曰始吾親在則無以養今  
羅五鼎而親沒矣嗟乎人子一菽一水不及其時則五鼎千  
鐘無以贖之況處末世道與時忤又不知鼎報之何如也然  
道周有母且奉遺骸以畢茲生俯仰之間進退無據於是呼  
天擗心而哭曰古之君子不善於一時則俟之後世不獲報

於百年則報之千古道周之辭不足以傳後之君子有閔其  
志而知其行者亦其惟茲

羌黔雷之真厥孽須兮置罔寔而不字肆余祖於彼霄兮嶺瑟  
隣譎而不吾睨遡漢漢之敷敷兮沴自天而來辰言窮彼往牒  
兮諏子屬之所載亦鼻始彼軒轅兮與元囂而爲昆季夏首浮  
於南服兮羌有熊之錫氏惟秦占卜之曰後有達人兮曰在於  
荒瀆歲闕逢以執徐兮有龍適遷而在野豐露譴其跳伏兮屏  
翳黼黻而不下怪彼靈之栗涖兮悍不顧其非所遭時亶其已  
艱兮固沫處之綦寡颺颺糾葺以裴摧兮夔蹠蹠而嚙蹠天吳  
嶷磔彼淪波兮挾馬銜以肆跨既訾骨之不靈兮又捐胡之不  
可鮮世不知龍之爲彩兮逐蜴蜥以就羈馱座隨之藹拾兮信  
匪龍之所居蹇旣負此施艾兮曷不戮彼馮夷悼兩螭之香遄

兮顧疾踢以中理帝既憐茲之介兮將錫厥土而有悔操虵躡  
足而諱詆兮鍾魑又附耳而舉珮曰宣縱之允兮俾徐鼓於後  
緯端蒙冠於作噩兮子小子乃越水魚而下暨始龍夢彼乾精  
兮嵌鏐鎔其若鎧趨崑崙而結珣兮旋盤礪於腑內羌誕余以  
屆期兮闕彼澤之昧昧槍楛跟盪而靡據兮恐失龍之所托龍  
既愛余之偃蹇兮恐予中之不堅乃飾予以美好兮而申之以  
蘭茝既濁處而飲清兮從余之所先思華渚之遺芬兮恐不  
與世乎相善緝雙翅之瑤璫兮將御茲以四薄羌一舖其九祝  
兮日晝起而宵作載揜指以比蹠兮亦擊腕而較膊思予疑以  
就立兮若賓帝而享乎鈞樂夫喜余之日邁兮不自敷其歲却  
也劉彼臆以爲餐兮羌罔省其自瘼也愍爾頑之無知兮錮厥  
衷而不可授枕鋌鏃以爲嬉兮函蒼龍之九百口狺狺以致辨

兮窮奇困敦雉盟而先後詎撥穀而出臆兮復醜浙以爲糗匪  
緣牆而踏迹兮羌嗜險而利蹈行則與僑謀兮眾故不卹乎予  
幼裔狂怒余岐嶷兮將噬予之含衄髮四墜以披離兮厥角鬣  
鬣而鬣鬣顧睇余不可噬兮復寘余於所懷彼龍挾雌而請購  
兮巫陽致欸以中猜帝謂余之蹇產兮將放余於二華之崔巍  
羌悲龍之躡躅兮復然予之塵灰知夫子之爲崇兮顧愛而不  
忍置也彼奇節之不改兮又曷脫夫所累也龍閭閻而俯詔兮  
遂驃爆而轟奕擢招由之扇胤兮拳伏鼈以爲幟怒百龍之眦  
予兮德乃反而爲厲鑿九疑之危冠兮龍門東其垂條屈雄虹  
而結珮兮將曷用此蘭蕙彼彩則不彰兮而約渾敦以華綺眾  
魑踔齧以避予兮必窮危之態服彼貝之帔阨兮曷不觸夫所  
忌不念彼龍兮邏婆慕堯而喙訛蹇予有此脩姱兮憤與戚其

交敗繳天吳之罔及兮素虬去不可醢不自諒其靡勝兮徒積  
戾而中惓悔翫鬲之多躓兮將寂處以證聖史魄既利予之盲  
兮鬼曠又如余之善聽勦七靈之髣益兮諱戴匡之司命余忍  
稟以就頽兮哀彼龍之悽恫歲既化而爲殘兮又孰使爲余正  
魑魅誑誑而設禱兮髣佻噉而致崇貢烏喙以爲參兮羗恐余  
之不就瞑夫帝烈厥戮兮而罰之不宥曷懲彼龍兮以重厥刑  
柔則蠲而條傷兮醴則滅而搗餅疇爲卵而顛巢兮疇爲孟而  
覆其型化長穹以爲羅兮臨九達而設罟肅爽喪翮兮何尙一  
翎桂中奭而多蠹兮固不若乎葦葑信彼頑之傀儻兮夫不可  
以爲子怪芘肢而果被兮復雉冠而鶯嘴帶蜉羽以蟬綏兮躡  
鸚趾而人鞮螭則吟而虎攫兮蟻則踏而蛟起羗鼠嗉而獸搏  
兮曷不去而自治山都讐而乃親兮竈神嘿喋而不見理太陰

搔獨以遠避兮顧歎然而自是蹇帝室夫彼聰兮嗟而言之已  
聳剝被犁於礪麓兮芳餌於瓠廬輿脫輻而濟川兮檣櫓駕夫  
崆峒彼龍蠖略以長號兮中憑螫而有忡顧爾頑之致辭兮又  
誰以爲余善命攝提而傳余兮謏司理以爲薦司理爲余其靡  
譴兮攝提又導余之罔變羗百鑿之內集兮感自咎而中戰嗟  
達者之罔追兮撫將來而展轉亶忠信以爲操兮締條履而四  
綢劍陸離以就鑠兮翼樞楨而不敢翺裂長裾之猶縈兮天弧  
葍萑而就蔽棲樛枝以臨淵兮巢折葦而垂濤凜夜處於岷巘  
兮虎豹起而四嘯上驅以迅雷兮而下錯之以鐔鐵龍既善余  
之剛肆兮又恐余之不克肖外委瀧以綽媿兮中努礪而自劭  
顓精誠於上游兮而彼 之不余弔鞬跛鼈於孟門兮騰黃屈  
踣於泥淖禹鼎斲以鑿兮鑪玉律而爲釣巢大鵬於蚊睫兮鷄

鷄假羽於鷦鷯鷓鴣以掣颺兮竊脂市而長噉彼鷓鴣之菽  
朐兮從桑扈而有不可朽厥腹以上糞兮飄墜賊而下墜大德  
與戾而爲媾兮憐以妬而相破騏驪鑿落以前御兮封豨又御  
轡而騶左測圭景而以泐兮履虎尾焉用跛積旣薄而靡勝兮  
又曷足以遠禍俞兒駮駮而遠去兮畢方躩踞以下鄰覩妖狐  
而珮璫兮乃誨余以長鬻凌陰起於窻窻兮蕤藜蔽芾於中闈  
魑魅羣逐而索賴兮過獯陽以反唇旣竊余之蓄藉兮又槃據  
余之所陳驟賂賂而取酬兮鶉援衣而索恩余顧茲其靡辭兮  
柰彼龍之瘞疹霑蒙幘其上沓兮矯周迴以焉準焞熿離而恐  
聖兮又錘搗之使燼石轟空以下壓兮猶恐其不克隕慨彼澤  
之滂沱兮而涓滴以爲余愁蝸房巖嶭於岱華兮翦剗產而若  
牘胡兩螭之躬隴兮剔摑挽攜而不肯進夫四土之覆汗兮曷

余茲而孔瘡睽霞起以氛集兮云彼帝之所都鉞南命於兩闕  
兮斗北揭而下斟敖客啜啜其欲噬兮又襲之以矛弧羗巨靈  
之手撲兮亦辱顏而不得俱擲无瓊於滌洿兮芻狗登於玉輅  
錦文犢以秦時兮麒麟折足而就捕嫫母主鬯以爲妃兮無鹽  
媿而自媿彼婉孌之佚女兮乃踰時而靡娶亦有命其在天兮  
又誰審厥故嗟爾盃之不極兮詎援茲以爲解曷不脩厥職兮  
顧儻悅而多怪齒巉巖而設梧兮衷冀壘以爲砮繩泰山而使  
直兮不自知其狙獯厥有緯而罔治兮又遑恤乎其外彼龍輓  
格而流沫兮已蝻惛而爲蠱謂彼俎之皆腥兮曠恪恪而出嘔  
惡鱗介之恩恣兮執河伯而剖之訾炮醢之莫享兮攝醜祗而  
咎之夫安酌彼銀漢兮漑巨澤而爲溲羗臍臍之必汚兮昏不  
念其所貞中怍怍以自數兮慶彼蠢之不克若慈烏毡毼而蠟

處兮厥穀哈喃而反嚙天女嘔軋以哺雛兮鷓鴣還思其所託  
睇飛駁之登巢兮子向戶而負箔獲狙杓喬於樛陰兮獠狄顧  
而四攫彼貆生而跑咻兮猶銜麕而反却胡戴弁之頰裘兮日  
奢語而不可度水狐賽於江涯兮雞渤爲巫而嵐鷹乃旅於  
介邱兮傍司祝以鶴留攜層厥醜以爲餐兮拱鼠致而余授足  
趨且以中尼兮將安貢以爲羞忍并舖以就死兮疇與龍而分  
謀縱改節其爲服兮惻吾心之彌憂金曷雨於上時兮粟曷降  
於中疇孰白烏而角馬兮乃底茲而不克究羗彼頑之不惠  
兮信非帝之所晏雖糜體其莫報兮又力食而曷憚揉折木以  
爲檐兮劓金圍而用鍛師王良之策御兮擘杵白而坐歎厥畢  
楂枒而焉寘兮蓋屋馮礪其用憲舉軒轅以爲車兮又寘彼牽  
於河之岍輜毛若而靡舉兮固掩睇其曷庸詢古哲之所履兮

余又罔知其適從夷探蔽於首山兮棄墨胎而不共疇匪親之  
遺體兮而捐肢之若蓬引亶父之未殉兮伯遷墜夫厥宗挾孰  
哉以刺裸兮隘二儀之靡容嗟諸昆之懿德兮而不可以爲軌  
將倘况以上征兮用博審其所紀羗茲世之斷斷兮諒不一乎  
余是百川淳泐而鼎沸兮華嵩陸穀而營壘雷震震於顏廷兮  
坑塹生於後趾荊棘差牙而不可餐兮余又安能以久此也告  
彼龍以言邁兮從招由之所向審厥土之疇可兮將御茲以方  
攘秣素虬之赳赳兮八駿戮其跌踢過閭浮之所都兮夕以屆  
乎都廣齋沆瀣以爲餼兮徵鳥嘯而致餉羗焚輪以內騰兮凌  
霍霽之沆瀣顧窈窕之無人兮中霍繆以自疑鬼血燐於丹仞  
兮雀網纏縶於八維探蟠桃之未華兮羗傲人以調飢涉聚窟  
之傀番兮載舉裳而揭之昔厥龍之故居兮又掩袂而避之筮

東南其喪朋兮將西適於崑崙怪金母之寡處兮載勝雲鬢而  
未皤胡夫人之罔儻兮鬢易紀而爲頰愴念茲其中悶兮素虬  
黻駢而不可反飲弱流之泌滴兮擷鼉梁以獬狝閔風靡磊而  
駮駮兮日隳焯以南出訊彼黨之所尙兮又謖咄夢縱而靡實  
託神鷲以爲媒兮青鳥又笑余之求匹始余駕以南翔兮長離  
邀余於中路告朱明之所就兮將偕余以共往蹇雜珮之旖旎  
兮神女窈窕而相慕舉流霞於紫觴兮釀扶桑之垂露羌信美  
而靡娛兮又孰知余之不敢娶也嗟厥衷之筆策兮挽彼漢而  
用瀉肆商羊以暨被兮望白榆而繫馬渺彼龍之所處兮極蒼  
茫而不得下咨變鳥之所宮兮巡房心之次舍旣沈寥究寔而  
靡親兮復毳毳其焉求羨玉體之苾芬兮束神麻而爲芻苢妃  
惡余之莞結兮佚瓊漿而肆酬炮玉免於瑤璫兮矐丹雞之庶

羞鼓娥皇而命鞬兮簡狄揚其清眸羌厥情之闐闐兮亶容瞬  
而易世素女攤其繁音兮又唳嘯而拭淚夫彼媛之婉婉兮而  
曷克乎余計胡子喬之輕蹕兮捐厥親而遠逝乃祖覽於四極  
兮顧歛剛而不一詣召安期以前導兮將遍履乎大荒怪瓊苗  
之芊眠兮亦有砮石以爲蕙稂種飛節之九晦兮鬼目代以爲  
漿神漢灌於埜渠兮洞酌茲而曷嘗貯青鸞之紫膏兮剖羶羊  
之素肪鍊神堯之翠韭兮根伯禹之餘梁禹梁旣化而爲枳兮  
翠韭變而成藍羌詹廉而不敢薦兮寘菴莽以中悒顧彼龍而  
中憚兮耿籌繆其若怒允處茲之匪所兮蹙四騁而蹙蹙異夫  
函蓋之窄韞兮而靡所雪夫餘轍也羌塵積以爲墜兮又焉所  
而得潔也策余駕以迴飄兮遯蹶楚變前疑而靡聊夫彼老之  
罔俟兮霰滲滲其將漉蓀葳蕤以自是兮蕢希蔭於長條棄彼

士之不居兮乃凝思於赤霄冠珥巉巖以如焚兮復手摩於鉞  
斧綴鋒芳以爲珮兮復帶鑄之葆虎愍遠去而罔執兮不計龍  
之所怒旣摧廬以屏捍兮又曷禁乎外侮蠹九尾之鎬鎬兮儻  
鯁鋸齒以爲鯨虵借鏃於射工兮梟授翼於猛猱中迅迫其若  
矜兮助爲弦而中抨羗委孩於林薄兮又窺之以兵魑鱷穢泣  
以窺人兮日又嘯學而將暗舟顛沛於鹵波兮乃楚訾而索纜  
服蹇犢於羊腸兮又搥刺而使颿信俾龍以得宣兮余雖逞其  
靡憾帝卽惡余之莫理兮曷縊彼龍而使不得遯獨劇余之筋  
骨兮余亦其誰敢怨羗蹴龍使垂垂兮又剽龍之中寸直爾頑  
之爲崇兮將斥逐而罔遠爽彼龍之啟轉兮而不獲其所依岱  
宗奩以梁甫兮乃克斬其崔嵬岍蚤屑以寢翕兮將曷保其嶽  
崎絲縈繚於懸岍兮環璜瓊而綴之載寶鑱於詹諸兮凌竄窳  
而決之譬彼偃之不戢兮泉日瀉而終泄井則恩於窪瀆兮誰  
用食其所溲世未劊夫余咎兮詎云其不余好昔遠徙於汗漫  
兮又安審夫崑裔之不余傲也縱奇節之曰改兮誰呼帝而庸  
告也■余屨於涓濺兮又曷計於安蹈也金母辛辛而苦訓兮  
曰余思其所答世旣徽蘊以莫知兮將蹇聲而罔合夫子不揚  
親以爲名兮顧逖邇而於邑羗駢首以就殍兮世又孰知夫爾  
心呂鼓刀以獲載兮甯叩角而哀吟伍趨趨夫江上兮乃行乞  
而用潛彼介子之翫標兮厥與親而俱灰若旌目之靡庸兮亦  
自棄其匪材胡崇伯之爲戮兮而禹不以隱處重華友彼木石  
兮顧念厥宗而式序蟲有蟄而後起兮水有迅而先沮恐促織  
之邀翔兮木葉紛而來下夫余茲之所懷兮羗颺唱而靡言路  
辟嶮以齧鼠兮目瞪矐而內智余初服彼葳蕤兮結留夷以爲



緡中愴肅以上戾兮將以詣於天門屬強禹為先容兮乃告余  
以未啟呼雲嬰而使牒兮顧愍敝而不見禮彼銀漢之濯滢兮  
又漸帷而不得濟曷不覩夫彼宮兮闈要渺而莫底超欲舉以  
中尼兮徒駒芻而踟躕擗牛女以挹清兮謁彼嶽於陽區厥神  
鬢鬢以四叱兮顧自寶其所懼目攝余以退避兮余將從乎泰  
壹允彼古之不可方兮而余曷敢以有寗羗厥醜之罔啜兮又  
安敢以云醒長沙降而余語兮謂余堅其所脩爾縱瘵以就隕  
兮世實罹於厥尤不念彼龍之從殆兮將厥罰以誰受也二儀  
睽視其焉稅兮羗左右以何求既顛精於罔獲兮益重龍之所  
羞揲芻茅以言筮兮策安兆而能淑義箕苾芴以余告兮天火  
變而初六既出門以靡咎兮胡遯尾而得厲猜怛中以再瀆兮  
乃外革以為明夷曷登彼天兮而傷於地云貞不可息兮又明  
而用晦劑三卜之所尚兮是爰得乎余志鑿白石以為巖兮爰  
遯乎窳辟之宮緝揭車以四綢兮駟鷗交而相通服齒縶以為  
飽兮又續之以巨勝龍囓嚼彼藜藿兮乃歌頌以為順胡厭世  
之詭囂兮與麀狸而結信鬼車确轂以哀鳴兮魑魍列而為陣  
昔天吳之所鄉兮將更茲而彌創與眾爭於此土兮眾亦訾其  
不亮羗身世之相仇兮料脩名其盡喪既不可以為子兮又何  
適乎世用縱帝錫彼璇宇兮亦匪爾之所娛天磕馭其將裂兮  
顧策駘其焉驅握筆憇以為節兮繫蝮蛇以為編醜徘徊其忘  
所兮不計龍之所虞禍有重而罔更兮僂有過而罔理操虵說  
謚以行譖兮鍾魁蹶然而坐跡帝不卹余之靡據兮遂挾龍而  
遠徙歲彊圉以為難兮日月值於矛蛇鬻贖跑踣於首山兮虎  
豹嗥而羣誇巨闕夕以為湖兮不周陡折而谿衍惡彼頑之不

從兮猶瞿然而四拏委子子於中野兮將曷避此颼颼長松摧  
以爲薪兮恨不一覩夫白日茯苓發以爲塗兮詎免絲之足卹  
羗軀茲而得贖兮爰曷斬乎百身天讖屨而日高兮海汎瀾而  
日淪淼然規夫故宮兮夫不知其所臻予信愍其罔顧兮曷金  
母之不爲慮云茲土之跼踏兮不如捨而遠去挽飛輿以夸父  
兮徐吾起而爲助緩則須以千古兮促則不及乎一語湛盧掩  
馭而赴淵兮貽銘刀以盤錯步景驂於天駟兮乃鹽車而駕犢  
嗟彼生之有適兮胡獨余其靡祿也且多執而不庸兮考爲醢  
其得所娥宛轉於水滴兮精衛舞於江渚乃彼龍之無子兮又  
不見其愛女始呼余以若螭兮今乃知其爲豸也蜥蜴羊疆以  
嘉拉兮顧瞻然其敢視也慶有難而罔俾兮又曷鞠乎此子也  
珠已溷於溝渠兮乃必碎之爲是也百靈截力以下夷兮詎拊

龍其未斃也縱一日之有宣兮又胡所而不得死也帝錫余以  
後允兮不如無毒之爲美也茫滄漫汗而爲腥兮余又安知其  
所底也忍眦聶以長視兮將以報夫後社也亂曰二儀脂車兮  
五嶽爲輜余往挽兮余柰何兔魄就陰兮變烏爲罔余往留兮  
余柰何岱華欲頽兮渤澥傾波予往支兮余柰何亢角爲咎兮  
橈槍爲戈余往敵兮余柰何天壹爲豎兮東皇爲魔余往驅兮  
余柰何滄海爲田兮石髮爲莪余往採兮余柰何馮夷爲舞兮  
湘妃爲歌余往賡兮余柰何歿者黝然存者雙鑪余往殉兮余  
柰何將來兮如何未來兮如何橫江潭兮思如何

離疚下

黃子曰道周作離疚時甫踰月中緒雜亂百感俱集其比類  
俛辭鬱結遠出不暇刪割以歸於雅而間錯以憤世之語有

非孝子所得言者雖在今日亦不自知其所至也既閱有四月稍審人事乃徵其遺緒罄其幽曲不敢以辭云

長夜守歲兮明星隱之敦敦虎豹踞關兮徒內戒而不覩乎天門羗馮下以啻遠兮又踢乎繩之以寸孰睥蠻之必答兮詎號迅哀以不聞羗下上之異照兮而鉅細之必反夫彼眾之離離兮又曷計乎余身左鉞斧以右圜兮固宜其不余卹恐好脩之有懲兮願得噉乎一語嘗獲怨於爾靈兮信非龍之故也曷彼醜之就繩兮獨夫子而改步也世既不得以爲正兮余將捨茲而焉告靈氛理弱以莫勝兮將曷固乎余導中泌冽以涓涓兮又安能使余以不怨初服改之不早兮底於今而爲患雖創余以厥艱兮胡彼戮之過殫也羗中闕而窘步兮颺卷空以晦冥喬木槎而爲灰兮塵茵化爲茶蘼詎溢寵彼貪狼兮俾踐躡乎

司命厥操數之倒置兮迷不知譴之源賢人菴彙以就屏兮余又曷忍乎苟全羗奔走以四觸兮夫誠不知其故宥提孩於殤宮兮復奪之乳哺出游釜之髻腮兮而寘之於窘涸豈有愛於予兮而重余以不惠羗余溢以就死兮亦不足暴乎余罪也龍垂髯之窳絢兮燼繚壇楨而不得攀鵬鳥毳毼以礪嘴兮喙鶴雛之肺肝呼徐吾使贖余兮曷必羈彼雙鸞爲鼎而不可抗兮精羽若以徒潛孰則駕而可追兮裂余冕乎吾將去地天絕其莫通兮又悵然而失路顧四體之靡寘兮揭乎若撥之樹椹粘漂於洪濤兮安用載此獲樗君旣溷彼滙川兮而洄酌於潢渠羗緬度於所終兮不如反乎其始水則絕彼源兮終以塞於泥滓紛怔忡其靡勝兮未及圖夫所悔曩麤礪身以跂僂兮題肩絳葛而相趨草蓊葳而粲密兮咸傲予以不如彼庶躊躇而

靡憐兮乃知夫奇節之有奇禍羗言更以莫及兮事固小而終  
大始亦彼靈之余恣兮又焉省其不可幼秉余之淑艾兮又飾  
之以僎表紛飛節之綺纒兮羗不吉之爲兆屈軼生於途隅兮  
曷任夫世之綦履弱棘負夫豫樟兮斧必尋其枝蟻彼烏之啞  
啞兮繳者必怨於其母紛其樂於余袖兮日計余之將壯羗余  
長之復用兮滅不棄而殊傲亦知夫蕭脂之爲腥兮而艾纒之  
爲香顧彼性之所嗜兮亦安能驟改於其常責華聊以弭首兮  
曰是吾將釋女繫鸛朋而以翮兮云吾必得爾子靈亦謂匪其  
故也旣使余有此姱質兮亦胡邈不知其準曷呼余以升兮而  
納之阱指咎由使執則兮日爲余聽極莫含怒以待余兮人有  
過亦思其得始假余以彼蠢兮余亦曷其敢求女麀麀相失以  
哀號兮余亦不在獸之野予旣思以極兮將告乎其來下謀底

茲其罔庸兮亦使尋夫痛之緒繡厥咎之總總兮又不知其信  
然將上下而求索兮恫乎吾將周流於天路信遠其靡極兮夫  
孰察余之所至中駢駢其曷寗兮風颼颼余上戾羗吾衷所自  
裁兮又唵喃以誰告余將高馳其孰引兮惡夫靈氛之數化孰  
異事而同情兮將以重於余悼余將登於天洲兮攬魂魄之所  
棲世旣不憫於余生兮余獨往其又何疑響吾旣赴此傾嶽兮  
恐我龍之不終棄余將東說彼青皇兮而勅勾芒以爲使將攬  
彼蒼籙兮故曲跪扶服扱蹇而陳詞顧彼人之不諒兮謂與余  
其匪昔又傲余以震電兮謂余之不足直莽納納其焉屈兮則  
不見夫靈爽上彼宇之霏霏兮海水下起而湯湯余將下底於  
幽宮兮价文魚之鱗鱗發游鼈之彫梁兮以考於鮫人余將賂  
彼六虬兮俾助余而求索乘淪波之薄薄兮夫亦何所獲闕疊

間之激絕兮余將從而下之銀漢隆隆以沓馭兮余將縮而上  
去紛離離慌其奄忽兮白日亦避而不親中欲絕以被涕兮駕  
逍遙非余正余將反於故宮兮凝召精神以四馳喟馮心乎不  
敢視兮辟質中其長飢進不足以有遂兮退又何得以帖處恐  
失時之不吾矜兮靈將寤而遠去余將征夫鈇山兮嚙白石之  
盤盤朝發余於留骨兮瞬息稅於壺輪迅余佩之揭揭兮不敢  
乎少緩近崦嵫其彌迫兮日且暮其吾何從路側裂余莫辨兮  
醜語麼邏而不可通渴飲余彼弱流兮日夜而不得濟羗續殷  
以相望兮終然棄於鞠之外余將極於陰都兮約土伯之鬚鬚  
下砥而不見天兮欲升之無階爾既不省於世之人兮又何足  
白乎余罪余將駕彼文螭兮下抗以鵬翼駿鯨之宛慕兮周  
覽八垓余乃息紛披離以四去兮各笑予之不量既蒙難其亦  
已兮又何所而得尚鴻既搏於紫墟兮繳者猶視夫中澤羽旣  
逝彼長波兮猶欲乘而爲翮彼靈霖之已降兮又孰概之於天  
夫予之所懷兮曷卹乎人言孰有求而靡獲兮孰精專而罔格  
余將登於瑤臺兮望陰陽之所薄察中氣之分兮從升降於左  
右余將訴彼司命兮爲余語而究之涕浪浪以下被兮信遼廓  
而難當望已遠則不力兮耿將迴乎故鄉旣鞠築其不任矣中  
怛薛兮吾焉捨前闕翳之莫因兮後又孰爲余藉肆蹇產以咋  
噩兮雖信幅而非禮言茹蒞以中薰兮闢廣庭乎吾將躋顧疇  
眾之匪余類兮亦不辨余之非是中有喪其安集兮邈邈不知  
其何止余將叩彼紫宮兮願一告而少休孰肝腹其異寘兮帝  
錄人以爲仇余將命鷗曰爲伴兮繼之以射豹集命於中涓兮  
又匪爾醜之道哀彼輿之連連兮余將逐以至老也余信賤以

莫伸兮亦胡衷之不得報也帝召余以前戒兮曰既往之不可  
復咎與人而俱逝兮其又將焉度或事與數而相適兮亦不計  
乎其後爾則累以及親兮又嗷嗷而繁舉羗好脩而賈福兮則  
誰以市女飲毒者而駮號兮將以速其殞爾固才之爲蓄兮猶  
肆恣而焉騁羗及今以亟反兮爾不知夫禍福之則信彼言之  
要眇兮余亦安省其極余中之所懷兮終不可乎一釋願一見  
其罔從兮卽重予禍其余曷顧余將贄彼白茅兮盪瓊華之茂  
茂沐江蘿與蘭膏兮吉日乎泰壹將來下揭婉婉而就之兮彼  
其不余妬紛彼申於帝詞兮將進余以異術曰爾反於無思魂  
將自壹爲十日寂將反於其室馮馮倉倉乃重之逸重曰奇兮  
爲帝之所秘百靈亦其好諛兮爾乃不識乎諱忌孰不固而能  
存兮孰馮馮而不見棄夫彼人之爾遠兮又孰奪而去之攏鹵

執而墮之兮又孰扼而拒之羗余亦知其然兮願偕存以再爲  
惚中屏而遇之乎蓋愴夫所思羗彼膺之癰腫兮安能禁其多  
息維首之中潰兮安能慨然而劃之余匪今其罔變兮羗有所  
不忍也哀彼路之旣窮兮徒行告而滋疹恐靈之反夫故宮兮  
又皇然而不見余帝闔局不余望兮反首乎吾將趨天下垂其  
欲折兮風雨前之颯颯青女凌於余孤兮飛廉迴復而相尼夫  
靡龍之故兮余乃不知其所恃頽余此中天兮又辱夫余理余  
亦忍以苟全兮尙以覲夫皇祖莫載世之德兮迄於余而墜之  
哀人生之忽忽兮露與霜其遞至龜屢瀆則不余筮兮詞信紛  
其莫從慤內美之猶未化也不如責於其躬金母降以致誨兮  
羗亦與余乎同言訊彼蒼舒兮亦謂余其適當帝重華之無子  
兮故飄然而終逝伯禹種德兮去還復乎帝啓咎由不及爲命

兮益故以膺於上服陟克宗彼訓兮乃邵其先德武丁思過兮  
祀乃不棄於豐腆周室捐彼二仲兮亦厥季之有繕日克事彼  
鬼神兮武乃用以不死尼父不聖厥德兮今亦知其孰氏蘭芷  
鬱以飶馨兮芬歷茲猶未改珮瓊瑤之踳踳兮履險益其不息  
顧自昔而已然兮胡乃今而是謀火及窆而將焰兮夫乃築其  
重籌既喪首以行馳兮而討之內固譬樹則顛兮猶視裒其枝  
葉夫余衷之所急兮非脩名之不立也允彼名之爲禍兮余又  
安省其可也女嬃頤頤以懇告兮曰爾勉圖於其終若行邁以  
底舍兮厥四驚其曷庸夸父不絜彼力兮終然死而莫殯聶子  
殛其肢體兮厥姊亦終以不順伯奮偕於仲堪兮乃表彼高辛  
昧旣師師彼元冥兮般庸祀於彼 匪姱脩之足尙兮曰其宜  
爾彼物之不更作兮尙曰今其維茲集芙蓉以爲裳兮夫不可

以終歲挹揭車之蒙蒙兮夫焉禁其不敗尙鑿彼華嵩兮余冠  
高之巍巍束雄虹以爲悅兮飾以明星之徽徽上衣以霽雲兮  
下裳之霓華攬宇宙之章章兮日月來其車紛信美以悅目  
兮顧余衷之所戚也羌彼世之所慶兮將重夫余弔也譬則瘞  
於下土兮圭乃升於文几餅則搗於彼馨兮晚轆轤而佐祀將  
遠舍而去之兮終甘彼蓬藜羌兩美之不合兮又孰讚夫余泐  
及余年之未邁兮亦不忍以此乎終沒旣獨行之罹咎兮恐眾  
是而不可遷羌假其有义兮亦眾之所平夫旣不獲夫成言兮  
恐昔余以不義灼墨食而兆之兮象濛濛以若涕條金變而成  
斷兮由曰鼠首其有悔介石不終日作兮將討乎而罪捆余衷  
而投之兮余安忍以向割耿弱質之不固兮至中道而就棄顧  
余之所懷兮羌彌古而不可變也上下求其罔獲兮余安邁夫

所戀也吉日歷於嘉兆兮眾告余以可駕既百神之有悔兮豐  
露抑其來迓譽將重以高馳兮匪余衷之數化紛前乘以鸞鳳  
兮乃不薄夫余德上駟當以應龍兮從鸛鷖之比翼紉盤專以  
媚余兮余安能以有解勉戢志而相從兮孰知夫余衷之所在  
先余馬於九嶷兮訊重華之內則言還彼會稽兮證伯禹之遺  
極曷寵彼皇考兮非夫帝之是享生不逢其時兮羌信高而莫  
尙誓上昊之朙朙兮睇崩雲之霍霍登高遠顧其悠悠兮迅飛  
鳥之矍矍捐余珮於縣河兮涕汎瀾以交襟縱象輿之四逸兮  
羌余信其莫禁告閨風而言下兮夫余亦誰爲期彼瑤臺之有  
女兮固不念而至之呼帝閨使登余兮遠不見夫子背倚閨闔  
以四望兮亦不見夫其外嘯颯哀而莫勝兮顧余咎其中疑曷  
帝之余縱兮喟喪志以歷茲反余旆於窮桑兮夕秣於元池繼

日夜其不休兮余尙有所思乘明星之薄薄兮及晨暎之皜皜  
救過則遲兮爲德則早約余衷之寃寃兮凌長空之浩浩指北  
斗以爲正兮直千秋兮余依路漫漫而靡端兮夫孰知其是非  
亂曰象輿霓旌曷方攘兮賓彼元都不可方兮柰何爲期永相  
望兮有鸞戩翼聲中商兮雙雛陸離閨迴翔兮御彼竹實前稱  
觴兮千秋萬歲獲商羊兮重曰命在天兮不可爭名在人兮不  
可營在陂兮思以平宣兮思以傾報死兮事生余艱兮以貞

九繹

凡十  
一章

貴者延第一

奔濤磕馭兮摧珊瑚蘭嵌巖兮春未蘇旣積雪兮不得泮芬曷  
第兮中枯春風來兮吹絳帷蕭以脂兮然則醜神苾薌兮莽徘徊  
徊日在天兮露未晞露未晞兮春不憇握手兮天爲誓與君期



兮朝暮至來施施兮從沛沛夜繼晷兮數則滋晷倏夜兮不半  
世登斗杓兮觀四時日冥冥兮何其思公子兮君不知

大藥第二

爾瞿瞿兮曷所望管崑崙兮乾爲鑄西來兮商羊烹蓐收兮熬  
扶桑余有猜兮中自放躡鼉梁兮心養養塞太壹兮吮嚙削賓  
連兮不敢享崩尅圉兮疑故宮踽踽兮予曷戎雖則不孤兮  
淒中荃不允兮余靡庸告王母兮心有冲欲前兮喪辭薦石蜜  
兮懷瓊芝畜不素兮能無疑能無疑兮甘素芻藝木蘭兮去其  
茅蘭雖短兮以馨蓀信芳兮千秋

巫咸告第三

襲騎電兮驅雙虬君誰須兮風上鰲眾莫知兮從所游招不來  
兮挽不留靈氣肅兮紛颼颼咸爲先兮巫爲後告予兮靡訖予  
不可兮軫以憂燕飛兮差差蟲號兮啾啾曷不駕荃兮上逍遙  
荃棄予兮時來思予棄荃兮不得又篋策兮暮奏日遲兮月驟  
路信遠兮不及足天信邇兮不及首夕想兮瞻瞻日望兮賀賀  
荃不思兮維余咎君告予兮靡訖胡帝子兮不余宥

以難第四

睇彼嚶嚶兮百鳥續明夫人有歌兮自不得賡回涼颺兮曳幽  
泚欲有言兮復中止桓桓中原兮白日則迷締蘼蕪兮縈以芷  
逐兔兮騶虞萊登登兮稱豐琴憐嫵媚兮不予媻非娥眉兮則  
妬子含顰兮不得笑眾導余兮羞窈窕朝入門兮誰以歡暮入  
門兮中盤桓余所思兮傷肺肝借青鳥兮生翠翰欲言兮以難  
知不及第五

靈脂車兮乘流波靈迴旂兮挽長河松栢凋兮傷女蘿女蘿兮

不足顧鑿丹脂兮朝復暮置高堂兮飾金當神欲來兮然疑作  
秋風兮曷常瀉白茅兮澈九疆知生死兮曷溫涼生雖悲兮死  
則已貴如雲兮賤如水曷捐去兮不余視繫長庚兮登九嶷回  
厯曜兮眇若思濯銀河兮雙纓垂知不及兮聊言歸

荃之顧第六

宅箕尾兮鼓鼷享素妃兮羅百珍日淹淹兮不見人闕下土  
兮生清蠶蛟涎兮溷溘毒草繆眠兮魍魎佻佻藜爲機兮樗爲  
輪哢軋活兮苦以辛紛腓離兮櫛下塵日遑遑兮不得踐及暮  
兮待朝及霜兮待春思懣懣兮艸艸蹇變變兮皴皴荃不知兮  
所親荃所親兮匪予人有子兮不可陳安得荃兮排秋 訴上  
帝兮哀余貧予貧兮不若君何爲兮不還顧

下士不可居第七

君回攬於九州兮乃知夫雄鳩之未巧余使鷓鴣爲媒兮鬚鸚  
臯而來教狸戴勝以結珮兮御雙麟之嶽崎竅瑜則冠兮九衝  
而馳僂僂垂唇兮又益之以嘴妖鼉如山兮刻以爲龜土車兮  
蹠踣而鸞追迓相柳兮錦封稀祭百神兮以爲尸剗二華兮封  
三峴胡其鞫兮娃其衣春冰兮渙渙而將洩築長垣兮余殿屎  
鵬爲巢兮鷓鴣之眉杞棘兮禦飢儻高駝兮莽迴眎允不可留  
兮在此子不良兮曷以爲

江潭第八

淼長江兮紛以瀾去桀桀兮不一還東有尾閭兮南有焦山人  
何之兮存世間闔元扉兮不得叩訴陽侯兮莫予受採宿莽兮  
中不舒約不就兮憂不除菘有人兮懷趨趨非所師兮彭與胥  
湘妃來兮愴由與舉重華兮飄衫裾亦各有親兮罔念余余胡

爲兮鬱扶賡南薰兮聽鼓瑟舞精衛兮增六律雖以娛兮各銜恤

戮赤菟第九

靈圉圻兮肆蒼傲紛四下兮翼以吮山靈兮逡邈而奔逃赤菟  
自尊兮跑虺荃薜薜兮蘿葛相綢忍以聞兮中刀刀裼狐裘兮  
蝟之毛曷以爲漿兮鷓鴣之膏豈不祥兮予所操辰之日兮甲  
旦予告兮將遠呼司虞兮爲予斷開陰崕兮聿北牢驅殊類兮  
不得憚鷓何爲兮中洲懶何爲兮江畔鶴之輿兮塞肉端追奔  
車兮儻得歡齊擊鼓兮間鳴鸞

黃農沒第十

木葉青兮鳧北翔苔生兮夾堂菊將華兮紛以霜人生時兮不  
當帝高駝兮曷從翔攬中州兮渺無方毒艸案候余曷以嘗縱  
右瓊華餌不得長岐俞喋喋兮徇九疆安得起兮享餘糧沴蜮  
成羣兮鳩鷓爲祥百草薶蒙而方攘雖有至人底老不揚黃農  
沒兮余則悲不寢近兮寢以離紛美人兮繚余思登首陽兮採  
綠薇回商山兮攀紫芝

惜將來第十有一

怨莫極兮逝者哀思莫煩兮惜將來將來兮曷期嚴霜降兮木  
無枝處幽谿兮聲不長照寒楸兮顏不光木末披兮鳴鷓鴣卷  
阿難兮江之岫時不違兮以華鬱泥滓兮生蕖蓮與君期兮水  
涯麥蘄蘄兮張兔罝酌椒漿兮與君醉慨以歌兮山之外年未  
逮兮歲未改言及時兮捐所穢涕淫淫兮思爾生攬轡兮吾將  
行

亂曰余何瞻顧兮遠不得正兮君子履艱不得言命兮憂爾厥

中語曷竟兮堅固余秉兮執以爲信兮或以諒之冀有定兮

九盤凡十章

迷九達第一

輝日翳兮青鳥告鼉駕言游兮中若颯喪馬兮薪余輶繫鴉  
首兮軌元枵總七曜兮齊如組蒼龍湍纒兮膺白虎襄徇兮中  
路蹇將趨兮不成顧西臨眩腦兮鬱駛陀左森漫兮山爲波鬼  
凌陰兮騎元豹蝦蟇兮擁道羌才了兮中剗盤匪焚輪兮胡自  
寒蹶躩兮危棧彼美人兮不余善裂指南兮醯騰黃七聖兮俚  
俚疇余家兮閭白傷

迺蓄第二

帝翻搏兮卷下土降瓊池兮鑿鹹鹵鮫室兮變岫宿麒麟兮今  
猓豸勅白神兮改圖君曷爲兮反古纓長虹兮冠紫霞節之舞  
兮殷之車裳木葉兮餐朱華五石錚闌兮誅神蝸重巨靈兮擘  
陰崕毀鼎兮辟邪塞龍門兮瀚爲洼拯彭咸兮水涯靈均憩兮  
余之家掄白骨兮鬼爲馬友鬪黠兮師沒者寤想兮不宣巫傲  
傲兮來下

在野第三

屬象輿兮同爲駕紛來迎兮匪乍帝謂余兮不平百靈中叛兮  
余在野闐沈濛兮錮長空霰如咎兮紛飛瀉淫囂兮瓔樽魍魅  
喁喁兮前奉單萬木怒兮知秋十日登兮猶夜夜何盟兮長不  
辭春何違兮長不思中怵惓兮茹荼登堂兮偃採芝介猿狖兮  
闕都市鼓鉦鉦兮狂猋駛塵蔽山兮如靈籬中絕兮誰之子

利用折第四

聲簸簸兮晝雨霜二儀交戟兮義駕西藏飾長劍兮曷爲劇終

南兮堙土囊兮冥兮不從交馳兮心有忡游八極兮扶六龍立  
會稽兮剗防風歸余兮發慨紛陸離兮余佩鞞洞庭兮韜兩華  
英英兮不墮挽雄虹兮飲滄海雖不遂兮中所快中所快兮  
靈不從星燐燐兮火鎔鎔君不利兮思所宗信利兮誰可通截  
崔巍兮剖崆峒匪任兮曷庸厲不貞兮永凶

假余第五

假予徜徉兮飾艾厭百靈兮徂徠攜徽繩兮正之挾棧準兮平  
方外策元駒兮凌轟逐還騰蛇兮北臺東有岱嵩兮臨滄海中  
崑崙兮戮章亥說炎皞兮官巢燧排王良兮下世幽貪狼兮東  
弧矢滅六國兮銷白帝危冠兮崩零綴衝陽兮旒繁星沐河漢  
兮濯南溟裴徊四極兮廓伶行趨秦皇兮追溟滓曷歸來兮自  
治骨爲度兮體爲規禍將延兮余眉陸梁兮曷爲

胡不適第六

彼美人兮胡不適中想思兮輾若怒素牀兮竹筭衣蓋膚兮雜  
玻璃崔疏兮冒階欲前兮有違璫不長兮約蘭芷薛爲帶兮藟  
爲鞵靈綃兮錦房桂不焚兮勸自香信美兮匪余所茶余甘兮  
不苦鸞輿兮霽輅沐神漢兮膏元露青鳥兮媵余織女前兮成  
流蘇來無期兮日不月蘋垂垂兮涼颼發夫人兮矢靡他歲暮  
無子兮愁如何

石髮第七

石髮披離兮春濤蹇寒裳兮激迴湍波爲霞兮傾以山朝復暮  
兮余則難余則難兮潮復汝石髮生兮岨之側秋風兮鯨涎鱷  
鱣吐子兮蕙綿曷不從兮渡黑水盛蠙珠兮蠟爲簋踟躕兮誰  
所思擷其彭兮曷貽鷓鴣迴翔兮羽用儀鵬南巢兮永飢

不祥第八

浴蓀稅余兮聽舍言余御蓀兮朝軒轅蓀有疑兮中捐忝蓀兮  
不余繁世謂蓀兮不祥蓀兮莫有明獸率舞兮陶唐胡封狹兮  
跳梁鳳巢兮彼阿胡鷁鴟兮以戈麟在野兮傷百雁鷁鷁爲冠  
兮峩峩蓀則不固兮疑者多邑犬羣吠兮知如何蓀有謀兮余  
思胡去余兮傲傲鬪日月兮振畢皆來啣啣兮愁二儀愁二儀  
兮曷所適羅在天兮坎在澤履百艸兮不傷銜元芝兮將誰食

羽人來第九

羽人來兮超若集駕六螭兮不可繫馥臙膺兮嬈以媚拓落兮  
凌風立禽躡兮鶴蹈婉戀兮又疑躁遭男女兮不分情不一兮  
各所好吹玉笙兮撫瑠琴前呢喃兮鳴余心響兮笑兮間微吟  
外不從兮曷禁態莫多兮日相眺愛莫深兮知者少月就沈兮

日東暈歡不極兮妬相要語微吐兮不得授君可思兮遠以驕  
信然兮爲余離君何爲兮獨逍遙誓不從兮君儼儼乘迴風兮  
舉紫簫

曷渡海第十

君不樂兮無與娛命陽侯兮舞錕鏐馮夷翻兮河伯御駭湘妃  
兮奏脩竿信美兮傲儻鞭白石兮沒列嶂濯新冠兮掛扶桑扶  
龍車兮支雙杖君曷爲兮渡海服匹雛兮登崑崙誰併君兮戮  
之起夸父兮追不逮日落兮風西來虎豹嗥兮猿哀古木稠繆  
兮鬚鬢遷列國兮望崩臺語則窮兮託微嘯維余舟兮軋四棹  
舊好兮倏若銷雲悠悠兮疑然逸赤匪狐兮黑匪狸思君兮有  
標安得馮夷兮鼓礧礧來蚪螭兮開余羣

來胡遲第十有一

人不良兮匪天則爲日虞淵兮游不歸泥首兮號帝闈索百神  
兮不肯祈百神兮交不素昧昧兮曷余顧亟歸來兮胡越且挽  
霓輿兮少回駐霓輿兮不可干霄兮倏以挫知予尤兮傷如何  
巢顛兮轂破君不料兮思忉忉種辛夷兮焚則芘夕不離兮誰  
懷抱睽一息兮不得報一息兮千世雲暝暝兮疇余眎君信哀  
兮胡稱辭傷來兮胡遲

亂曰維矢則縱不得繫兮言鏤厥膺不及背兮蟻生於穴垣則  
墜兮積垢在餅不獲溉兮藜蒙彼牆眾所眎兮烏棲於庭君則  
諱兮君信愛之曷不謂兮毒攻乃躬躬自瘵兮狡兔則脫罹厥  
雉兮子不克職爲親累兮皇皇后土誰職戾兮

九訴凡九章

帝無臣第一

帝不憚兮軒嶙峋闕闕兮無人闕班流兮生清慨紉琪花兮  
不足佩下徵荃兮蠶元圃紉霞文兮緇爲組幹杖輪兮葉以緇  
曷不代兮蘭蕙息轟馨兮韜燿電御紫宮兮開清宴斥青皇兮  
討朱明荃謂爾兮不平日暮暮兮躋龍宮荃將棲兮博山河漢  
凝兮長漫漫窈不親兮天之顏言借翼兮飛世間旂不迴兮軫  
不還哀余思兮涕潺湲

大司命第二

肅窺宮兮寂不可方中有人兮顯類藏擊玉衡兮頡以頡不得  
執兮君惟常君信巧兮陰與陽雙斗屨屨兮難爲量厭塵紛兮  
離九疆清庭兮寂房叫廈叫兮儵而荒緝組雲兮高八牆列虎  
豹兮齊以戕焚木難兮鬪神羊矻不得近兮睽眦若盲安得御  
兮攬故鄉舞七魂兮荃之旁斬操虵兮誅陸梁君不可兮中途

傷信存兮疑亡惘徘徊兮飛安翔

少司命第三

與君游兮九嶷君自尊兮予自卑有言兮不盡辭君飄飄兮曳絳旗君須兮余後來攬九州兮煩若思終別絕兮交無時恩不固兮怨終至春辰兮爲期霜慘慘兮而在內君屢辭兮非君爲誓不顧兮佻然逝星搖搖兮日將出草披披兮而在墜與君兮結好思所終兮捐其早勉出涕兮爲君道

偃佺第四

交不夙兮情不素哀相去兮歡相慕歡相慕兮惠然顧倏相并兮爲余誤春風颼颼兮生蘼蕪華旣實兮眾英殊言入出兮與君俱君解衣兮降白露逐間道兮不一遇幽谿深兮多靈雨天不高兮雲欲下君何爲兮漢之渚言思君兮不得去夙何時兮君中堅約蕙芷兮同精專握手兮交行雖無言兮誓不捐誓則捐兮變鹽海蕩故宮兮及余罪併子美兮尼子車天漫漫兮誰干載

山鬼第五

躡木末兮降白羽朝楚楚兮不得暮揭車兮射干縈爲綦兮曷以餐美人兮氣若蘭雲繆繆兮倏而散霍離余兮江之畔旣嘲余兮又微盼余不信兮君之惠款折柔桑兮雜碧草將貽兮遠道莫授余兮云未老江有瀨兮生白沙遡澗澗兮棲雜窠窠冥冥兮柰若何秋青兮夜紫游蝮蛇兮橫深水君卜家兮余里紛以籜兮繁茅茨歲旣暮兮風若其君離余兮余不思

龍女第六

江有瀨兮天益高君叫怒兮生洞颺日冥冥兮思君勞君不來



兮中膠膠靈何方兮森若逃暮期君兮江上臯來無期兮爲君  
怒羌知君兮不得敖煢露露兮中相綢自有雙虬兮焉得翺追  
雲車兮鳴天鑿橫銀河兮曷容刀君視余兮非所操蹴岱華兮  
崩長壕銜木石兮過奔濤與君異兮今已遙欲從君兮從斷鼇  
中不任兮上訴逢帝子兮方含怒君顧余兮爲誰故

三尸第七

靈鼓集兮間清吹紛娛人兮樂以羣魚何爲兮水周塵何爲兮  
庭際予何來兮前鼎鼎春風平兮草葳蕤鬱黃庭兮開絳旗寂  
浮磬兮奏元池媿百神兮舞參差余攜子兮將施施予無家兮  
予所私荃則仁兮以慈子不割兮禍所歸眾莫知兮予所爲白  
雲生兮蒸蒸水流兮磷磷將高駝兮爲帝陳

東華帝子第八

明霞冠兮芙蓉珮予馭雲兮爲君蓋霓裳兮紫衣予牽虹兮爲  
君帶日生兮暘谷照扶桑兮生華萼碣石高兮臨水深晞余髮  
兮爲君沐君敖予兮不肯庸麾予馬兮繫蒼龍紛所登兮尙以  
穹從君左兮不及右與君御兮交手花駢駢兮日色耀歲將暮  
兮與君邁君交多兮不專多貴游兮棄貧賤雷闐闐兮交鼓鳴  
玉兮雜土予有言兮不得聞朝暮伺兮見微氛東風颺兮雲從  
散日御君兮不一見從小昊兮非予善予獨處兮思離離魂飄  
搖兮爲君旗日向昏兮中心悲

諾臬將軍第九

伏氤輪兮石上雲下賧以金商氣龍羣予所宮兮中爲君藉芊  
眠兮闕元垠君不憚兮予急急予跳號兮君則不聞聞闔開兮  
帝窘窘灑銀河兮滌眾慙百靈登兮珮繽紛擁長劍兮搏霞文

升所知兮上帝欣安得荃兮結君勤下泰華兮攀茵芸酌太陰  
兮御清氛哀下人兮筮予魂與君處兮晨以昏渺不知兮君恩  
亂曰天門以幽不可方聲高以邈神哉襄神哉蹇蹇霓雜纒矯  
予美好不得敷持人以怒中齋嚴望而不躋何踟躕脩絜以誠  
冀有明晉矣不征誰爲臧東風離離余將行

劉招

楚將逐諸宗之服美者曰是傲儻爚我族子景差與焉藁舟至  
於激尾將居吳會於是屈原未死迺齋桂醑擣瓊漿謂巫涓曰  
江水東逝往者不反彼美之汎汎遂反於亂爾爲掌寤其能無  
言巫涓曰唯吾將招之不究厥性未審乃度何釋何戀何畏何  
慕乃汎招曰爾盍歸乎爾邦之人於爾乎無猜爾盍歸來曷舍  
爾之樂土而就彼蒙昧爾行不載焉居不載鳩曷爲漾漾而乘

輕舟爾盍歸來天下之有家不如吾匏之瓜色失在塗血白如  
椰爾盍歸來父母之委蛻則有妻子困不可懟劣不可鄙高門  
之人矐目鋸齒一睇白笑面諾反詈爾盍歸來獨行之苦苦於  
捫幽谿鬼稜生冰影呼如豨前有不敢號退有不敢思一鳥銜  
髮白肉委地爾盍歸來爾盍貧是安盍窮是歡耘松耨桑其樂  
千端虎窟有肉莫之敢取驪珠在海褰裳去之爾何爲乎舍爾  
室子自稱逆旅爾盍歸來逆旅之賤賤於浣淪厠遂塞竇滓承  
糠蒙髮鼻口易治締冬續夏爾盍歸來爾夙好之乖外而況於  
殊輩目生植柴頸延連葦或十擬而一對猶未得其類爾盍歸  
來爾曷不選聞汰色食簡苟活城齒重關樹舌不拔爾曷自奔  
逸批耳嚙膝汗血及踵漉水莫食爾盍歸來爾曷昆昂之疎而  
童僕之親誰守誰居廓落忤怔相彼僮僕乃利乃貫裕則多患

約則多怨爾曷自乘蠱揭足與濟惡疥而就厲爾盍歸來春秋  
之不可淹數徒之松顛南去頹羗於今而不懋將及於黃土爾  
盍歸來少居性親它人異心田父莠驕交多肌銷爾盍歸來遠  
方之人不可與謀屈原聞之歎曰是其辭繁而不曠吾不能復  
用巫涓也乃重招曰爾盍歸來東方不可以游震澤之天吳摩  
牙欲嚙我殺西方不可以游峨岷之虎兕摩牙欲嚙我殺爾盍  
歸來天上不可以游天上九關一關九虺狡猊十犬鈎爪電手  
啗金沒鼻嗜火如酒爾盍歸來地下不可以游地下之昏昧層  
淵重湫蛆蚓之爭鬪如奔牛兔窮骨酸常啼啾啾南方不可以  
游南方之熱熱而愈下北方不可以游北方寇虜折骨如樵剗  
婦槩孺斫彼娃媠以鬪纖姱爾盍歸來四野之清阜無如我鄉  
鴛鼠鳩鴟變爲鸚皇鮪鯨鮓鮓佩蘭以芳錦竹文犀遠郊連坳  
導爲脩徑重罟複格網紫褐翠以造媚室岑淵所迴冬秋無風  
因埠窿窪別階西來賓從誦言奄串德義皆燠赫之沃而真素  
之貴鉅生鴻儒簧游磬騫動與皓月摩肩行與炯星交連靜躁  
脩倩各其所會晷光濯足而起重陰呂望晞髮以跂東海信眾  
吁之非靡或獨唱以何悔伏臘歲時餞霜賓曦醬鶉炮雛燿鴿  
粉魚象箸兕觥晶盤紫榆雕鐘鏤鼎冢文壁書起而行之親友  
相勝窈窕卻步少長遞進接衡泌之孔嘉去伐檀之太甚信人  
生之有命雖讒慝之何禁欲布名乎天下恐不如塊處之爲審  
亂曰爾盍歸來喬木無陰尙可息些竹實傾筐尙可食些不謂  
爾鳳尙有翼些不謂爾麟爾脰未折些題爾毛羽故不憚些四  
方多艱翳白日些我躬不閱繭愁疾些未可以出遠無極些爾  
盍歸來涕沾臆些微子之故我不能食些

續天問

甲子之鼃有神下集勒數鴻相別櫛玉宓授余魚書曰獲厥藉  
靈策五九以紀天地九首之皇四萬五千歲凡三千七百餘歲  
闢一天地以唐甲辰迄胡丁未數文以龜賢士出涕余曰疑然  
孰固而移孰畫得避余將迅之曰二隱五章孰從比只脩越短  
差孰從理只別干派支何所繫只厥遄渾窰行何止只何與人  
謀爲眾規只列宿何旋與人相舐只軫還蒙鴻觸何戾止孰慙  
孰醜荒洞曷擇百神馮馮何所暨只帝何慕奇爲世厲只眾曷  
所遠聖曷嬖只日安不及曷偏昧只背元陽虧胡不得砥只月  
死復育星曷克墜只盤古曷歿瘞骨南海而曷流膏以漫渤澥  
只三女協產而自爲匹曷殛崆峒復育巨翼只康回朝極女媧  
胡職而帝不力只十日并暎女丑曷斃曷揮袖自翳以爲雲雨

只脩行胡貞不得其生厥宿爲孛滅淫曷行只投壺何失負矢  
何直電曷以 日曷以棘薺間何洩懸漢何極只欽鴉及鼓曷  
殺其祖帝戮崑崙而曷以矯翼只窳窳啄害曷云無罪見斃負  
貳帝曷嬖之乃變龍首神何聽焉而爲之宅守胡鳳喪羽而不  
見弔又胡充白雀而不隸於鳥戾檣三世曷黎克宣地螾堙塹  
而曷爲禱萬羊兩龍胡夢是競棄彼四季環七十二巡烏號之  
倫曷懼以神炎帝何服不及其女精衛西使而何所取筮之有  
黃逢天晦芒而曷大昌甯封善化曷不從帝而焚其骨怪義白  
阜以通水脈胡殺黑龍而濟冀穴又胡伯禹以相其尾黃雀赤  
首日旁焉止羿何墜烏而喪其妻生髮齊足語何所師金德不  
競又胡帝彼天曷赤龍產堯而不棄之寒冰稷爲厥鼻只胡命  
蹇而終懲黃星靡鋒上象曷替大魚曷沒元龜曷繼偃佺飼堯

赤松曷棄曷止何候而舜舉及帝襄城之野七聖胡迷胡納大  
麓而繆用晰夸蛾之子而負二嶽曷高密以聖而竊帝息風日  
就崩四害遷征曷二百歲龐眉以登七十二載而不得明覆蛟  
叩天隕星如雨丹州之鳥曷銜珠土曷崙山之女羞而化石曷  
禹不惡而蹠彼甫滄水之神以貢碧珪鬢鬢負舟禹用焉疑厥  
受珊瑚而却亥既禹何利只白環帝庭鞠體王母帝何每只越  
絕既王裸何理只犬豕衣而前何底只代耘之鳥曷去禹塚  
何所事只龜虎伏宰石榔胡傷賁山之乳以爲予子而析薪曷  
殃師門曷殺而埋於野孰負去之若眇厥馬曼扶何寃與羿不  
當而假逢蒙胡神之能而恢小康胡啓以德而終斃夫犬羊胡  
益終薦而臯陶之無後綿臣胡親胡生僕牛胡覆玉筐二女而  
一字曷爲多聖而無父之子空桑負祖以自爲是曷蛟妾化人

而告桀以吉凶曷徙之外國而御彼龍西門何負東日何起馮  
夷何告費昌何喜又何伊尹而聽於妹嬉胡七年不禱而日躬  
爲犧應龍肆續戮尤及甫胡竄於南而澤不及上帝何寵魃以  
敵蚩尤焚澤及枯又何所求支祈之獄孰云解只并封龍過孰  
共載只伊尹告逝曷晝晦只咫尺之魚曷共務光而負以背只  
曷傳說舍箕而胖於杵白又胡夢之形遍視羣工而可以求胡  
武乙作博與帝而爲讐有蘇之女胡比膠鬲而爲周胡義窮門  
而羨里之不慈胡九侯之女貞而昌以妖姬折蓋震乘武胡不  
憚積雪平丈五車何止且何所懲尙何所試蒼雲七蟠負斧曷  
踴三載不獲璜鈐何勳曷服澤衣而瘞之無尸厲神灌壇曷爲  
避只曷避其神而輕其主曷克事神而且用栩栩胡紂未亡元  
子竊器而先馳地震四方莫之或移胡納金滕而發用起白魚

爲鳥而曷以興赤龍有漿而曷以崩姬出天竈曷終崇只卜紀  
三十曷不繼只八十一而舉誦亦曷辱之克承穆瞞肆荒曷以  
西征曷偕盛姬而殯於寒澤曷鼓化虵而與神奕王母何竚而  
將之來曷誓復野而以終乖天帝暴醉金隕石墜曷反之河而  
使內穢下享無卹賜之翟犬深目猥喙號牛曷反武靈飢死而  
何以飛舉涉於秦野所得何語采女告王鏗何以去綏山厥高  
度之幾許赤鳥銜書曷喪國廬曷私厥檢不爲世取熒惑何良  
還舍而喜災烏何蹇夾日而死射之中日曷蝕彼月貢金爲土  
而蜀曷滅木鳶陷父乃不得報墨翟覆衣而詣何道沙蟲營營  
姬瑕何造白鴟繞烟之推何告曷弟白霓而殪其師曷斟雉羹  
而帝是滋曷良善御而騎箕尾曷吠狗寶服桂而不死曷以子  
晉而賓彼天曷甚因而以怪佞斃曷去土伯竊帝之紀曷以涓

彭而獲不死曷顏卜亞聖以爲地史曷鄰人子以抱犢治嗟  
冥之罔聽只块軋靡極以誰爲靈絕地通天誰升帝庭彼人事  
之錯齟只縱臯由而不能聽譬彼溟魚掉而自噓譬彼蟣蟲知  
其所居譬彼軫蠹雷轟轂轉蠕然不與譬以豸觀舞風過電  
不知其故譬鳥之翔見下而不見上譬空桑集蟻自爲帝長置  
目於九墟譬海乍涸而萬皇皇譬靈以幽則迷其方卜策鑽  
兆孰審厥要謀人以鬼不獲其理閭闔阻遠誰納厥睹惘矣下  
土以爲疑府攬茲違茲曷違余龜維千萬年誰宗余天

叢騷凡十有  
五章

若弗及第一

汨余若將弗及兮恐年歲之不吾與朝搴阰之木蘭兮夕攬  
中洲之宿莽日月忽其不淹兮春與秋其代序維草木之零

落兮恐美人之遲暮

嗟飛廉之颺忽兮夫不可與爲期始告予以整馭兮逃離離乎  
喪其所之曰季夏以有征兮倏蓐收之代至野莽莽而黃萎兮  
遂以及於長楸芟荷衣之莫勝兮紛木落而施兔罟百獸窟其  
向穴兮獵者其何所得寘純矢於荒隅兮枝輶車於絕域長子  
憤而遠去兮怒僕之不善御使僕改轡兮又不知于處天錮錮  
以有聲兮日濛濛而失路羌有追以不獲兮顧左右之維谷余  
嫉夫時之太固兮時反以余爲戮梗柁拱以逢秋兮羌及壯而  
襄志進不得以有明兮退不足以久恃蘭及茲而競榮兮芙蓉  
妖嬈以啓秀夕萎夫其所甘兮余故譏其太驟譬獵之逐獸兮  
不從左而發軌彼鼯之駭而喪其彤矢兮亦不娛夫長子世謂  
余其好異兮曷不及春之芬敷余固羞與同華兮不忍棄於中  
途矜予年之少壯兮不知夫美人之遲暮也知霜雪之將降兮  
余亦何能以不顧也赤虵伏其將舉兮雲湛湛而覆之迅鵬力  
之將薄兮風颺颺而足之旣歷茲而不然兮夫誰以俟余中若  
矢以四射兮乃不得其殼愛戟則當先兮愛爵則當後攬列宿  
之蹲蹲兮羌反却以無裨涕顧望之熒熒兮尙得窮乎四時  
亂曰已焉哉登輿不謀則謀之旣傾已焉哉畜鵠不飼則飼之  
天已焉哉捧玉不戰而戰戰於淵大椿植於傾岨兮則安能以  
八千年信覽草木之未得兮徒嫉時以不遷

哀眾芳第二

余旣滋蘭之九畹兮又樹蕙之百畝畦留夷與揭車兮雜杜  
蘅與芳芷冀枝葉之峻茂兮願埃時乎吾將刈雖萎絕其亦  
何傷兮哀眾芳之蕪穢

時既不得以余埃兮喬木剝之無陰四野廓不見人兮日緜緜  
而就沈醫閭闔豁以廢色兮又何況此百畝羌悼蘭之不華兮  
而種彼荆枳昔愛蘭之薢蕕兮集藁木與射干齎彼桑之膏土  
兮而焚其柔繫夫乃捐厥服兮曷遑卹乎其佩苗蓬蓬而不理  
兮饑則不可以載猶顧茲其罔捨兮夫匪余之所哀余信有此  
芬質兮雖菴縊其不改世非迷彼黔皙兮特其中之所怪余不  
茲孤芳兮眾亦不余害獨悲夫天駟之紛馳兮使眾芳之不  
揚天窳窳而失色兮草薺薺其懷傷彼荆枳之就棄兮猶不足  
爲余惜既捐彼猗桑兮孰爲余而白之歎曰愛彼蘭馨藥所覆  
兮泣泣彼桑垂白露兮亦不遂故兮噉曰蘭則利秋喬木棄之  
甘鞠改節孰則利之委於彼野抑孰載之春則偕敷孰及治之  
亂曰彼植芴芴則紛百英木葉來下紛棄於野眾榮共失失所

仰也零露以華焉得尙也哀彼蕪穢在庭之外誓不過之中自  
慨兮

### 民生各有所樂第三

忽反顧以游目兮將往觀乎四荒佩繽紛其繁飾兮芳菲菲  
其彌章民生各有所樂兮余獨好脩以爲常

蓀長兮江涯葳生兮水滸曾施兮洲中羅張兮屋下鳴鳩兮幹  
幹而追呼元凱兮屬屬而相乳麕麕兮衙衙而橫阿猿狖兮聯  
聯而承土鯨鯨兮蕤蕤而凌波狡獪兮蘭蘭而扶莽雲生兮霏  
霏虎兕縱縱兮在野眾卉兮披披風思思兮日夜迴岑兮發發  
而睇余水周兮夷夷而怨女狂童兮與與來還兮楚楚美人兮  
棘棘而中窳戚施兮陶陶而含緒鶴雛兮將將鳥獸兮孳尾而  
羣處日永兮豫豫石峻兮昂昂誰忍此兮與終古歎曰阿俗長



諛媚而違中儼質肆誕巧而多窮沫澤附脂肥則不駿約體就  
悅美則不豐行言若謠其後有才步止儻儻其前有鋒擊鼓秉  
翟魂遠去之泛深以流將溺其躬叛約以耽君子所鄙內厚若  
訥與大人從孰揆厥正以固余命方回爲愚檣杙爲聖孰艱孰  
娛不究其竟

亂曰貞女由冶不善睇兮葑亦有足不善衛兮佞倂而走謂子  
蹶兮蹇蹇之言謂余戾兮飾飾率古謂予贅兮疏質坦中謂予  
替兮時相而舉謂予滯兮當而不疑謂予捷兮疑詞勿明謂予  
蔽兮疑食弗甘謂予厲兮狐銜厥尾曷以濟兮雖允則樂非予  
計兮允則不樂曷終歲兮

無女第四

朝吾將濟於白水兮登闔風而縶馬忽反顧以流涕兮哀高

邱之無女又曰思九州之博大兮豈惟是其有女

紛余旣係此章佩兮又飾以瓊玖俗乃厭乎異芬兮余亦以爲  
是信余服之有當兮何必申以攬蒞此黨人之嫉余兮雖改佩  
不以爲美忍初志以固塞兮求予匹之所在及暘谷之方登兮  
飲若木之晨露許余顏以永好兮與美人乎相慕世薄余以有  
鰥兮哀二姚之不當女雖醜以信妍兮求者雖姱而不颺世反  
質以好媚兮將文履而設悅鬻褻帶於中閨兮匪九戎之不賴  
余命嫠女爲媒兮將捨此而遠■彼宓妃之躑躑兮羌信高而  
匪耦詢九疑之遺妹兮曰霄明與屬煌彼湘妃之所訓兮又儻  
遨而不可尙使余騁以從馳兮忽超越之無所惟晚世之佚女  
兮益康淫以日去珮縱縱彼雜鑄兮與瑋珩其不合朝將覽彼  
九州兮思少康之已家信博大以中疑兮旣捨此而焉知嫠女

還贄以致謝兮曰余不余理美無匹則莫擇兮德無耦則莫紀  
伯禹通夫嶽山兮羌不用乎行媒孰自往其不可兮若升高以  
無階有熊納於螺祖兮尙彤魚之未室解芳纒以上詒兮余不  
當其日彼九州之膠廓兮將覽集而焉下眾女而一姓兮焉知  
其不妬譽反施以舒憂兮信不任乎獨宿余衷詰遏以莫勝兮  
世不知予之好淫召泰祝而占之兮曰獲乎余心羨榮華之方  
艾兮謂戒予以忽隱兩美其何合兮恐焦瘁而不及嗟黨人之  
多嬖兮雲交交其下麗紛願茲以驕遨抑孰知乎余志也

釋堦第五

昔予夢登天兮魂中道而無抗吾使厲神占之兮曰有志極  
而無旁又曰懲余美者而吹整兮何不變此之志也欲釋堦  
而升天兮猶有曩之態也

鼉有神集於余之庭兮雜靈鼓之闐闐羽紛紛以霓霓兮氣怱  
勃而縱橫謦告余以趨俗兮謂及余之未老羗中幹而外疏兮  
帝亦以爲不好曰靈宇之匪所兮將棄茲而不居孰改服而可  
合兮將退處以從余中狐疑其不諒兮恐上下之異眎旣脩質  
以莫容兮何內美之足貴茲世頻其難入兮雖信化而罔是告  
彼神以反舍兮神怒余之不服曰帝可藉而不可抗兮過可悔  
而不可直孰違時而能章兮孰處暗而不墨羗始不余諒兮終  
抱戚而不濟初余發彼閨風兮戒驪連以行李望下土之塵塵  
兮中輕喪而遠恃顓忠信以爲媒兮介之以精專日余眠於彼  
階兮乃知其不然集窮奇於太阿兮鞭鞞余之左右曰余棄於  
下土兮復凌厲而焉究審彼黨之所尙兮亦與茲乎不遠世各  
捨以逐末兮夫孰明其本上下沓而■豁兮恐蒼黃之必反譬

勾吳之文體兮以桂棹而莫取蛟螭迅而鼓脇兮必假之毛羽  
雖信執於厥故兮固非其輔也繩人以所薄兮是以招侮也矢  
日蹈古守法兮乖彼眾兮俯眺二儀兮惚若夢兮矧方以圓兮  
則適世用兮余信不能莫余抗兮亂曰孰云汎海則可以匏孰  
云升天則可以階釋而他從固其義也釋而去之猶異態也知  
不可兮不可改也涕之瀾瀾焉得再也

僻遠第六

苟余心之端直兮雖僻遠以何傷人激浦余儻回兮迷不知  
吾之所如深林杳以冥冥兮乃猿狖之所居山巖高以蔽日  
兮下幽晦以多雨霰雪紛其無垠兮雲霏霏而承宇哀吾生  
之無樂兮幽獨處乎山中吾不能變心而從俗兮固將愁苦  
以終窮

山中兮不可以久居去土離鄉兮渺懷子親戚叛散兮廓獨處  
栗冽兮巖高而谷虛人迹滅兮獸追趨升高騁遠兮中踟躕儻  
回兮嶺絕而木疏鳥迹縱橫兮橫縱若鋤薄雨將降兮山氣舒  
戒以寒風兮百蟲祛祛日暮兮宵行燹火相擗兮鷓目猙猙悲  
猿兮終歲而不得宣語相聞兮匪所親交游屏絕兮獐獍爲朋  
雪飄飄兮焚薪幽道塞兮谿載平朝鑿水兮倏爲冰體骨凌  
裂兮望不見人草蟲屈勢兮寂廖而無聲鴻鵠南翔兮磬磬而  
自明回中庭兮不得行歲將終兮時將更觀百草兮中營營去  
則不反兮約無成來何期兮絕響丁丁年老兮別子而遠征秋  
風兮羈旅而懷呻林深喪道兮霜雪四并杳不見天兮崑崙兢  
兢猿狖兮失耦而哀鳴孤雛離羣兮羅之以罾已焉哉百草搖  
落夫何再生樛木上慄夫何得升山中兮無鄰欲歌兮填膺

不再得第七

發郢都而去閩兮怊荒忽之焉極楫齊揚以容與兮哀見君  
而不再得望長楸而太息兮涕淫淫其若霰過夏首而西浮  
兮顧龍門而不見

嗟玉隕於涸淵兮冀岍壑之再更被粘剝以爲標兮乃不得乎  
復榮彼鳥高翔以迅急兮欲繫之不及託審顧於故宮兮中多  
懷以泗泣思美人之頽靡兮寒中鞮而不化貌懍怳以不親兮  
從之而不可爲往黻黻乎彌遠兮忽不覺其高去匪余情之靡  
固兮時乎促不得御毛羽絕而莫通兮今罔知其所都履坦道  
以臨淵兮齎瓊華而爲茶上絕則不至天兮下馮馮之無尸從  
橫波於沃焦兮信不事乎檣櫓旣四駕以莫登兮不如反而有  
謀築瓊宮以遐眺兮安得瀉於我憂哀見君之無期兮雖流涕  
而不得君有德則若忘兮孰職報而可釋哀報亦其靡庸兮願  
及君而一見因飛雲而致詞兮安得及乎其便

冀壹反第八

曼余目以流觀兮冀一反之何時鳥飛反故鄉兮狐死必首  
邱信非吾罪而棄逐兮何日夜而忘之

蹇予旣棄此故邦兮共哀吾處之非土謂余好此離異兮忍與  
此乎終古禍旣重而莫避兮情雖密其罔訴魯繳信機其在  
上兮羅網信張而在下羗俯仰之多故兮余安可乎中處余幼有  
此遠志兮旣爲莖而改之孰瞑晦之可娛兮又攜厥蘭而穢之  
世耽耽而擬予兮予焉能以無害也匪邱子之故兮夫以莖而  
共載也鳥則避夫機矢兮故遠集於荒野肱旣折於絕途兮故  
捐輿而去馬乃邁彼凜風兮又送足而折羽夫亦不知其故也

余既錯此南服兮已審其變態帝囿余茲域兮信不思乎其外  
既故土之不保兮將去此而焉屈譬漠則不方兮乃徒涉而莫  
濟孰棄舟於衝波兮曰忘其所事予信嘗以禍兮亦孰謂不  
可允罔計夫所至兮乃履冰而下墜羗天棄厥孽子兮則終靡  
所容王屋跂而在首兮九嶷起而當兮匪余土之足戀兮爲魂  
魄所自始孰手負此重璧兮乃外出而棄之足不忍乎太章兮  
中踢踢乎忌之曰鳥飛必反鄉兮狐死必首邱余安忍乎是之  
曼余日以流觀兮恐濛雨之終蔽草木萎而獲起兮不知春之  
未至上既質之無天兮又下據之無地中抨抨以自數兮孰得  
尚乎余志亂曰履咎雖艱莫使中辛處禍雖烈莫爲世論中雖  
不辛莫使難陳世雖不論莫使愛憐重曰處彼幽篁不見天兮  
日月昭同時及旋兮老思其邦中拳拳兮子雖不良安得捐兮

有鳥自南第九

有鳥自南來集漢北好姘佳丽兮牒獨處此異域既惇獨而  
不羣兮又無良媒在其側道卓遠而日忘兮願自申而不得  
望北山而流涕兮臨流水而太息

生既離此末俗兮又託處此荒濇紛吾以此多難兮又無良媒  
在其側信雄鳩之已巧兮乃斥逐此鷓鴣世猶哀其性拙兮使  
終得乎此志蹇僻陋之莫伸兮顧熒熒其罔視驥赤汗而喪羣  
兮故屈伏以受繫鷄鷄棲於杙樑兮與雞鷺乎何異思帝闕之  
歸巍兮下羅之以列星芬與澤其交遯兮萬象趨之征征路信  
遠以莫通兮虎豹又起而司晨屬長庚以致明兮左營域而不  
將既乘此微風兮又遇豐隆而不揚哀吾蹇此異禍兮縱高駝  
其焉駕羗伏處此絕壤兮猶余罪之未播將階蘭以共萎兮莫

以定乎其可虞仲死不及親兮終去國而莫祀重耳不與彼位  
兮乃踐土而履之子止醜其莫藥兮故刎頸而就死胡匪所親  
兮乃歌狸首而避之指丈人以為正兮呼哭泣而聽之世既莫  
知於余哀兮又何必昭於予行予既莫及於先兮何必指後以  
為信世謂余之扁舛兮不圖乎其當孰錯節之既蠹兮而適於  
器用望白日之悠悠兮底黃昏而中愴倡曰有鳥自南兮哀鳴  
以思音變以商兮羽變以儀翱翔帝庭兮不及其徘徊南服兮  
達莫致之亂曰三秀生兮荒之野谿島兮臨其下芙蓉燦兮  
木末罽罽施兮嗚括括朝往採兮暮不歸言思君兮襲裳衣蘭  
芬兮菊晚下上堂兮君曰遠路偏側兮來者艱望夫君兮雲之  
間

大故第十

進路北次兮日昧昧其將暮舒憂娛哀兮限之以大故

離離者菅葉下敗兮嚴霜未降露先戒兮榮華未謝猶及載兮  
馳之逖逖言肅逮兮霜霰既降日昧昧兮芳芷以枯多蕪穢兮  
守志不固果為害兮質難以征猶昔態兮陷不得濟進不得退  
兮非余所甘余不諄兮焚彼峨冠詎惜佩兮非余所急余不慨  
兮揭裘喪領詎執帶兮中怒若狂逞以憤兮毀節喪檢名不足  
愛兮濟險棄輿眾為怪兮祛炤以霓勢不得益兮中固以貞不  
反外兮訾之信信維余誨兮過有式履罔所悔兮憂不得舒咎  
不得代兮蹈懷異路寡異采兮顧蘭以柔時不忍刈兮世不吾  
知思所在兮孰則限予維予界兮君子履矩為世會兮

改此度第十有一

獨歷年而離愍兮羗馮心猶未化宣隱閔而壽考兮何變易

之可爲知前轍之不遂兮未改此度車旣覆而馬顛兮蹇獨  
懷此異路

余旣降心以從俗兮猶未得乎世直紛處此岐途兮又坐斃於  
荆棘知余往之不僭兮乃陷於罔測睇岍谷之已改兮故南轅  
而命北德有時以不信兮守有時而不力孰予心之可化兮而  
彼世之莫易涕浪浪以交被兮予匪甘於改服也旣上下之無  
當兮不如反之爲得也繫騰黃以窘步兮故見鄙於鴛鴦鳳  
逐於原野兮乃就師夫黃鵠哀九州之信廓兮不一明乎此義  
信公道之能白兮亦何卹乎余志纓信長之爲侈兮不及視乎  
其佩雖哲者之有識兮亦不足爲怪思予荃之懷憂兮中益悼  
而莫措謂余有此離跂兮終捨茲而遠去彼世紛其曷合兮羌  
昏迷入之門不敢測乎茲芬兮故豁然而內寃悲所懷之不獲

兮顧皇路而掩涕呼轍而不及脂兮世果謂余就利余信毀其  
軌範兮世亦孰知其不合信駕於康莊兮世亦孰知其道子憂  
世之就頹兮不及反於中古譬余魂之遠去兮今迷其故土登  
泰邱而招之兮哀以率於曠野雲翬翬而四下兮不及見於皇  
祖世寢遠則寢隔兮思去荃之渺渺從彼俗之莫可兮闕橫流  
而太息亂曰委瀧若波乖素真兮行與世違乖乃親兮孰調厥  
中俛無譽兮車覆馬顛路不可殉兮曰改余軸何所遵兮執轡  
者非驥留見擯兮匪予所思予不得論兮

誰與第十有二

開春發歲兮白日出之悠悠吾將傷志而愉樂兮遵江夏以  
娛憂擘大薄之芳蒞兮攬長洲之宿莽惜吾不及古人兮吾  
誰與玩此芳草又曰誰可與玩此遺草兮晨鄉風而抒情高

陽邈以遠兮予將焉所程

傷哉蘭茲信其不芳兮吾將襲而幽之離房既不藉俗以有艾  
兮又曷待之而揚高辛遠其可尚兮冀內正之得明世信臊以  
不馨兮焉能代之爲傷惜古人之不及余兮使遺失此芳草賤  
則飾以爲綦兮吾將適乎遠道覽大薄之豐豐兮將遠究於七  
澤辨雲夢之錯產兮望芙蓉之爍爍旣信美以不永兮乃知夫  
此之爲貴襲而幽之旣已矣中狐疑以自異璞不泣以有明兮  
孰審其爲瑞雖邇此親昵兮不及辨乎余志鷓鴣集於荆榛兮  
世亦惜其文采彼不及於虞廷兮故哀鳴而莫止季女飢而失  
職兮怨女曠而見毀彼漆室之幽思兮獨與此乎不似世共採  
此菱苒兮孰內顧以爲棟荷繁采之足寶兮亦何避乎就巷交  
晴比於長離兮余固羞乎此尚也世淪胥以及余兮余不得乎

爲障也巨蠹蠱而負鼎兮眾信笑其不量也知子則莫若父兮  
荃固哀余之莫抗也始予猶顧此庭蔭兮今孰頡而慰之蔓荔  
薜之雜採兮羌亦匪予彙勉就世之芳澤兮不必託其臭味信  
世亦謂余馨兮又孰起而飲之豫讓毀體以成志兮雖妻子不  
知其故祿茹污以見節兮故顛沛於異路車旣顛於泥溷兮勢  
不潔其下體舟楫旣喪兮必援木而得濟世亦孰知乎余污兮  
而責余以非是道獨舉而無朋兮過亦自引以莫白夔龍黨之  
莫及兮羌咨度而無脊蹇離辟彼四土兮獨憂余之宗祏亂曰  
處若集木非予蹇也履而視地非予跣也躡而前後猶不余善  
也披髮之首不任冕也朱投之火不得辨也銳方以圭何得轉  
也漶漶兮遭時之殄也揭揭兮涉時之淺也郁郁兮知之遠也  
礪礪兮不知其反也



雖少第十有三

秉德無私參天地兮願歲并謝與長友兮淑離不淫梗其有理兮年歲雖少可師長兮行比伯夷置以爲像兮

昔與蹇脩爲理兮索美人以求匹執衝陽而誓之兮曰撫壯以有室旣余駕此霓輿兮乃辭余以幼艾曰將俟於後期兮時遂去而不再哀美人之旣老兮榮華落而就歲將去此而遠求兮今信不得其配世旣重老而輕少兮故不用此攬菹採芙蓉於向夕兮故瞬息而就萎余非負此脩姱兮信美人之與期余知夫銳進之爲咎兮羌終退而莫居世數馬則以齒兮今之相者舉肥飛節產於江涯兮與澤草而一眎眾不知夫所有兮故躑躅而捐棄夫自昔而已然兮羌底余其何尤傷美人之難遇兮霜雪遠其離憂追奔風以輕車兮羌不知其遠去師鴻鵠之高

駝兮猶不得乎朝舉俗溷濁以不清兮雖至老猶未得譬河水之恩淪兮俟何時而將湜蹇將遠而孤守兮世訾予之矜刻與世混以雜處兮又非余之極呂望隱於鼓刀兮至七十而始庸范蠡吠於狗竇兮亦華顛而得宗余固無樂乎躁就兮願抑志而守窮去彼黨以待清兮蹠伯夷之高風苟幽懷其不墜兮美入之心亦與吾心同亂曰行若縱轍時不得控兮處若握樞道不得讓兮道與時違直不見諒兮賤而理貴不爲世尙兮紛其可喜曷娛眾兮眾言易搖中若喪兮內顧以疑恐不得當兮桃則七載訛爲柑兮受命不遷思橘頌兮

無施第十有四

望三五以爲像兮指彭咸以爲儀夫何極而不至兮故遠聞而難虧善不由外來兮名不可虛作孰無施而有報兮孰不

實而有獲

夫貧賤而脩姱兮信昔人之所恥固子稟之所極兮今不得乎  
始息覽下上以周流兮乃知名之所起羌幽貞以內娛兮終與  
敗而爲軌善相齒而來光兮名相耳而來集火焰則就燥兮水  
下則就濕孰不求而能至兮孰不追而能及羌報者之不待施  
兮而獲者之不待實世旣樂夫射虛兮故去鵠而多失必何極  
而不至兮故有失駕之道物嗇守而能豐兮善多取以爲躁九  
折肱而或醫兮余今亦知所蹈非美人之故兮亦不忍乎改此  
舟旣覆而得壺兮乃幸喪其所有眾女妬其蛾眉兮乃幸不謂  
余美恐其不善媚兮猶改服而不見理故狐疑以莫正兮欲捐  
去而不決昔子夢徙於西夷兮路欲劈而中絕倏操棹於巉巖  
兮望彼漢而將決卜不知其所占兮羗守常之爲可必變易以

創濟兮終與途而相左善猶不得福兮詎薄積之無禍將顧埃  
於四荒兮攬氣會之遷化允變態則已極兮今不知其何更尙  
彼音與後祀兮予尙乎有朋反曰榮華旣不可逐兮荃不忍乎  
久瘁羗斂榮以向實兮故爲世之所貴亦孰種而不穫兮孰織  
而不衣必棄德以爲美兮亦孰德之爲累亂曰處禍雖烈兮世  
以爲常操德雖固兮世以爲狂發言以衷兮世謂不章反覆冀  
明兮世以爲佯佩不當長兮醴不當漿余何所施兮而報是望

登石巒第十有五

登石巒以遠望兮路渺渺之默默入景響之無應兮聞省想  
而不可得

僕夫戒予將駕兮予下處之不足窺履窻窳而不章兮噎遡風  
其不得辭登畏礪之巉巖兮余所涉其若茲天信高以莫及兮

復障之氛霧攬林薄之黝黝今日復匿而就夜左右去莫余從  
兮既處絕而無路猿狖跂之糾糾兮歲不可以語昔與靈有此  
約兮今不知其遠去審不忍乎離余兮柰時之不可爲步躅躅  
以日窘兮心鞿羈而不開締不得解絃不得尋兮來不得將往  
不得歸指余道於幽谿兮當石峻之峩峩何哀之嗒嗒兮猗  
何逐而不遑山河寂之無聲兮木何淩於巖巖飛鳥過不可因  
兮亦迅高而邈下涕泗交以凜風兮虎兕亦時不在野雲撥起  
之塵塵兮信涼而不可駕呼巨壑之砉砉兮世曷辨夫子音乘  
長飈以北征兮余不樂乎自南羌不知荃之所方兮故羈足而  
維心望故土之不遠兮乃限以不濟闕淪波之磕馭兮習鼓柁  
以從遊淩沆瀣之無規兮中汰擊之嚙嚙顧美人於中島兮又  
飄忽乎水滴側白石以江涯兮故余祖之所宮悲涌湍之漰漰  
兮舟與車乎不逢劍已失於奔濤兮乃畫舟而縮水器已攔於  
傾崕兮又安可以守此孰相土而遠集兮今莫命其所是歲忽  
忽以將壯兮猶不得乎爲理序旣秋余懷悲兮恐魂委於霜露  
荆枳葺以爲衣兮江蘼棄之中路曼長夜之悠悠兮雖邁之不  
顧時有闢而能章兮道無明而不汚廓渺渺以焉止兮今亦不  
知荃之心解洪波之繫纜兮吾下上乎浮沈處與立而相疑兮  
傷白日之就陰羌羽翔則鱗游兮怪言從之不獲聞省想而莫  
通兮孰捨此而求索路杳杳以儵儵兮登高臨下余焉度倡曰  
幽巖高兮多冷風幽谿深兮多靈雨靈不來兮虎豹怒霜雪紛  
兮寡寧土願從之兮天羌高天羌高兮不得下亂曰金石允剛  
時毀泐兮列宿錯耀時昏蝕兮河之厖厖時以湜兮晦不得彰  
明不得息兮鴻之啓啓來者弋兮或以不鳴貽乃賊兮雉華以

羅鳳見德兮不怠厥儀不以時忒兮往矣莫追來有極兮不為世憐為世式兮

賦

聞雷賦

洪思曰此必辛未六月子以救纍輔錢龍錫調官苦賜抱病上疏乞休未下時之所作也蓋憤周延儒輩之罔上營私攬權自恣日以喜怒反覆上前弄其雷雨也故子解澤詩云山川不肯雨天亦奈將何言延儒也錢輔之獄起於史堇而延儒與溫體仁實主之及子三疏救之一時烈皇雖怒甚然已陰納其言有欲生錢輔意而延儒意亦稍解且言吾當一日愆患上前而生之故是篇云爾何雷者唯陰依溷吾王之輦轂竊吾王之膏雨爾何雷者唯諾諾竊吾王之膏雨溷吾王之輦轂言延儒也是歲自二月庚戌至於六月甲辰百有四月不聞雷聲先是四月辛酉烈皇以久旱齋居下詔求言是夕忽釋張司空鳳翔易總憲應昌李御史長春杜給諫齊芳李將軍如楨於獄民大歡皆謂是不測之雷雨冀日夕滂沱然且不雨五月甲戌烈皇步禱南郊猶且不雨丙戌始釋錢輔於獄三日雨乃漸然有聲六月甲辰雷乃殷然於是沾溉矣故是篇謂自二月至於

六月小暑將降厥夕乃雷蓋是歲云

梁王新執奇卉於合蘇之園根葉未抽雨澤不下自二月至於六月小暑將降厥夕乃雷其為雷也殷殷庭庭在梁山之陽王疑其不暢意有沛澤當與百艸共之乃命枚叔吾丘先生為之賦枚叔曰唯吾王之游豫陶芳澤於嘉卉睠作解之夷猶歷春夏而憔悴舉甕甕之孔艱顧桔槔曰不惠挽白渠而已遠悼西成之不濟非無琅玕莫植自天非無珊瑚不藝自淵包煩壤之焚緼庭吾生之倒懸譬禁汗而不發呼醇醪曰激之釀鞠苧與鬱金引豐隆而食之厥有微聲隱於垣端若瞑若眩將號將謹彼野人之疎曠賦何縣之函鼓顧太卜而占之知雷夢之初寤矚吾王之喜色告嘉卉曰惠心謝乃公之雍容何金玉乎爾音枚叔既成王錫之雲雷之爵吾丘先生曰臣亦有賦為王奏之

爾何雷者陰陰依依

鄭政曰依依諸本皆作厖厖非殷殷厖厖已見前矣今石秋子本作依依從之師曠

云雷初起其鳴格格雄雷也其鳴依依雌雷也

溷吾王之輦轂竊吾王之膏雨爾何雷

者唯唯諾諾竊吾王之膏雨溷吾王之輦轂麥薪既枯游龍既

凋天步多艱雷車乃驕東鄰擊缶西鄰瀝釜爾來已遲勃窣誰

語但遲來之猶可知遂往之愁苦纖雨牽兮霏霏虹蜃游兮不

歸椽栗生兮山果肥王孫爭兮是與非嗟枚叔之多材獨持王

之金鑿於是鄒陽喟然而進曰臣非雷何以知雷之遲速一至

於是也臣聞雷者發於地脈形似肺石藏於天府聲似麟鼓虞

水因之啓疆東山因之破斯胡一旦而輕發齊春夏而乃決英

蕖舒兮澤未竭玉髓枯兮石未裂惠終風兮來何早瞻雲漢兮

誰憂壽洵商霖之彌望胡與歎於茗草枚臯中坐揚鱗而欲有

言王曰爾讓叔乎何昔敏而今鈍也臯曰歎天道之語默或多

躁而寡吉惟精幹之審固乃先爽而后得彼雄舉之揚厲固不

如雌鳴之括實遲草木之瞻注信天心之寥廓庶霏然之有章

慰杲杲之朝日幸吾王之不怒攀諸子而太息王為欣然陶陶

終夕黃初四年時又苦暘應阮在於陳留王顧二子曰吾望解

澤久矣昨日聞雷爾念梁園之事乎阮瑪應聲而對曰觀雲門

之始作蓋翕然之在簾肆咸池之將奏若鳴雉之初响窸林鐘

之何蠱發卻適而遂語料洪音之必試雖晚暮而何懼抱土鼓

之重遲擯瓦缶而不訴但祈澤於當厄豈必笑而屢顧歷盛夏

其始奮故以渥於湛露德璉奉觴稱賀謂思王曰阮生之賦善

矣曲終雅奏誰亂以大王之風者王曰微吾子孰能之德璉起

而賦詩詩曰隱其雷在南山之陽何斯來斯天一方翦拂朱鳥

開炎霜滌除火樹垂蘭房掀眸神女舒電光燭龍然鬚盤扶桑

笙鏞窅窅環銀牀為雷推車排未央琪華承蒲馥以芳妙言藻  
思娛梁王薄怒不肯觀高唐何為朝暮吟繞梁大王好樂斐文  
章小臣宿齋安敢荒

一本有鄭園新詩清且臧

洪思曰錢華亭之獄人皆曰以定逆案故也而周延儒  
與溫體仁實主之初欲發自兵部尚書梁廷棟延棟未  
敢任御史史堃方以內通諸瑞自詔者遂任之即被糾  
歸尋以袁崇煥之獄亦連遂速詔獄及子疏三上延儒  
意稍解而大瑞王坤亦減免之又以久旱不雨言路請  
緩刑華亭乃得減為戍定海衛華亭初出獄謂人曰  
非坤必無生理延儒見華亭言皇上怒時有可恨甚多  
卿等豈能盡知之語挽回殊費心力未幾體仁亦至華  
亭為誦延儒語謝曰非公等力救何以得生體仁曰皇  
上原不甚怒也於是聞者皆憤延儒虛偽此聞雷賦所  
由作也

### 梁山鋒山賦

洪思曰子以削籍歸漳海時之所作也先是子舟至留  
都便自餽小舟以五十日遂盡黃山白嶽九華皖臺匡  
廬諸勝既歸石養因念吾都梁山鋒二山一百三十五  
峯之奇皆過於九華黃山惜在南荒人莫知吾漳人亦

少有知者子獨愛其蕭然人外不求人知  
類古之君子遊世而無悶者故足賦也

壬申五月泛鍾山東下買舟泝江而西出貴池捫九華之巔既  
歸八月再出焉聊度筑嶺入黃山九華以青蓮得名黃山託軒  
轅騰譽其山皆嶙峋峯律萬仞不及羽客緇流兔營鳥集九華  
自南天臺而下黃山自溫泉而上杖屨瓢笠蠅蟻不絕其哲人  
逸士亦多覽覽折龜而從之游雖其久近殊顯而為眾所攀附  
稽禮一也予重繭經涉既數十日坐卧雲海栖遲蓮菡髮髯夢  
寐思其儔匹吾漳浦之南二十餘里有都梁之山絡繹峻削亦  
數千仞其洞壑巖瀑皆高峭遐邈其峯有蓮花香爐紫雲金光  
爵目瑞屏齊帝葛仙隼立鳥翔九十有九一一與九華相似或  
有過之無不及者漳浦之西九十餘里有天鋒之山飛頡攬睨  
亦可萬仞鈎梯懸絕猿鳥四時騰空逕度其巖廊崦嵫或數千

步皆在山脊如束腰甬其垂瀑飄注或數百尺皆自山囟而下  
如作髻結其峯有師子文殊玉女靈通鸞嘴白塔積石天池龍  
蹲鸞舉三十有六一一與黃山相似或有過焉無不及者然以  
僻在遐荒舟車阻脩瓢鼓限於漁津冠蓋迴於雁翼徒爲樵夫  
牧子驚顧動色雖在鄉邑之內無復知之者故德無崇卑通途  
者貴聲無奄達習耳者佳苟託處之離羣宜脩名之不立苟清  
明之在躬雖遯世其何悶乎下陬鄙士適有欲賦梁鋒二山者  
因爲賦之詞曰

維南極之融爍精魄離於瀛海顛下土使輔予得茂駿之所在  
曰彼漳之陽服有二峩之絕峙字都梁與天鋒排蒼昊而拔地  
盤鱗鬣於迴壑齶舌吐於千里塞翠帆以斛鯁不自棄其荒陋  
疑邃古之儼匠挾舟轂而下究出章亥之遺武遂選駕於遠驟  
扶輿既有此清淑乃似儻而自匿悟居遠之終泰聊避囂於遐  
僻服烝母以凝顛牧幽畦而納日藐一世之圖貌耿獨照其脩  
媵天下旣不吾知吾亦窅然喪其天下顧崆峒之旣遠睠女兒  
與終日師颺茨而不足分陽首之匪匹舉太姥以連卷曰予鄰  
而未親慢亭脩其璫簧實未免乎鄉人信予羽之高駝鼉以降  
乎北渚覩黃山與九華霍予邁乎夙晤元牝嬉其孿子何二丘  
之似女九華旣妹於都梁黃山又弟於天鋒呼鸞龜之成羣盍  
從媵以魚龍停湖海之盆沼錯更置此鉛怪樹鯤鵬之翹翠何  
所別其內外徒以地判隆窪人分高劣附邇者以多助徵聲處  
遠者以無交危絕曜光蔽虧風雲遂私天鋒旣擱其螭首都梁  
又斂其蛾眉春幽秋深豹嗥猿悲玉女之清臚獨眺洛妃之薄  
怒自持翩然不可期胡然我念之嗚呼道得時者駕時失地者

謝膚寸合於泰山霜雪栖於姑夜鐵勒有阻冰之蛆日南有長  
然之柘象以馴而庭中兕以囂而曠野麕何為乎綺圃麀何為  
乎狼藉諒造物之基置固高高而下下彼二峩之何知乃屹然  
而遠蹠夜因假寐見二丈夫偉然告曰鳥旂魚旸何隆何窪鶴  
脩鳧短何近何遠璫枝自繆霞液何周日華何私日蔽何虧傍  
衢之核希收邇郊之禾多求屨采散於練門金氣銷於吳丘乃  
若七澤之多迷人二陵之繁風雨荆山之饒熏艾綿田之多灰  
土皆貌近於焉敖乃形似乎陽虎縱招之而不往將磨之以何  
去吾誠不能分鑿於愚公假道於蜀主因翻於次仲借車於尼  
父故復塊然共守其處

### 洞庭賦

洪思曰子壬申八月以削籍南歸時之所作也子一出  
都門志在名山東南與區游放殆盡謂門人曰何圖杖

履遂包斗牛之美先自孔林孟林而下次及黃山白嶽  
五老九子乃還憩大滌與門人講業歸雲之洞然後西  
浮洞庭晞髮縹渺之巔俯仰浩然固深有樂乎此者雖  
自謂勞人棄子已不復知身世問猶有羈旅贈之  
及歸漳海謂門人曰吾既放浪南歸值徐霞客買舟西  
浮洞庭探林屋登縹渺峯有詩數十章既浮沈不復可  
問僅存此篇因偶書卷中後  
之覽者亦將有感於斯文

既凜秋矣胡不歸乎爾乃舍滄海之萬頃耽具區之一笠譬鼇  
足之卷蹕就鮒尾而喋喙於以陶汰萬有盪寫伊鬱俯散塵淖  
仰視日月悟澹者之皆定知危者之皆安信蹄轍以同觀雖河  
海其何間乎若迺天假逸資人偕勝具進無濡曳之規退無羈  
紲之慮波臣勉其遯思風旌導其徑趣龍魚安媵篙艣試事來  
往惠然如縱坂驥此亦造物所償於勞人真宰所飴其棄子也  
方夫處暑云徂涼飈已發鷓首西傾忽聞薰風甫解香山之檠  
遂凌鑪鏤之江及於日暮風迴舟鄰備戒葦縱菱橫舩顛盪沛



予已繫纜石柱從容安寐出破塚而不知入呂梁以何怪旣焉  
宵興風息疊帆復懸舟縱迅轡人忘長年消夏之灣已過元陽  
之洞在焉乃復擢舫渡渚引檣通阡還探靈威之穴蚩疑宛委  
之編訪毛公之廢壇意劉根而未然嗚呼如圖經所談林屋尙  
矣以爲通好岱嵩巷遇王霍曾一邱之未成何眾美之能度夫  
當楚莊之世不迸句吳洞庭之書尙連禹穴而好奇者以爲青  
簡之別都仲尼所寤說豈不過哉故山有瓌迹則異物來歸土  
有幽光則琦名胥附以彼外負阻深中包腴腋倚霸勝之餘風  
資懍慌之末說以遠射蓬瀛近藐嶽瀆使希至者駭其鮮聞經  
涉者寶其舊服則亦宜矣是以古審俗海張帆不視垆岸闡  
闡夜談多所怪歎羨生於所不足歎生於所不見以所不足而  
羨緇素以所不見而歎刀布達者猶然而況於寡陋之侶乎嗚

呼白之梁而南碣石而西番禺而東洱海而北予足迹所不至  
則亦多矣要於洪濤奔囓蛟蜃徙宮出沒象緯開眸盪胸自予  
所習翫則固有十倍於此者也而予固樂此者予樂夫百尺之  
波十里之山朝暮之風晨夕之灣幽人所棲漁父所理得其道  
足以長生不得其道不足以槁死得而生不必安期之棗羨門  
之李不得而死不必丹室之艸鳴琴之市嗚呼如使林屋復開  
龍蛇傳餐上覩薨楹下覽房闌左揖富商右莊峩冠雁行而前  
羊裔而還能有一人得太古長年之道者乎卽復不然別鑿包  
山左通會稽右綿瀟湘別將男女具芝朮種餌其中央能有一  
人得太古長年之道者乎夫旣不能則是林屋雖湮宛委雖滅  
東無差子之靈西無莊子之烈猶足以想晤禹德樂死無極也  
故夫志廓者不滯於舊聞見多者少怪於新趣諒岸谷之恒遷

省枕漱之未誤若夫林屋以西碧岷含風削困成圍孽勢如弄  
復有石匠天仇破骨出窳補洞成庭摻顛得腦泊夫石弄而北  
濬多魚齒宛轉嵯峨沓合湖水遯魚所穿環牙璧理大者摩岷  
瘞鶴小者游蟬側鯉固水石之恒觀不足御夫君子惟有日出  
波平烟銷飄輕登縹渺之絕巔涵赤澤於太清指三江於歸墟  
瀉五湖之未平更隨月吐假檻東山瞬息揚帆復通胥闕於斯  
時也不知身有羈旅之賤世有矰弋之艱張季鷹之蓴鱸乍熟  
梁伯鸞之杵臼初間淵岳已平函輿又寬破滯銷憂不知其端  
爲之歌曰湖水滿兮潮水深江月生兮滄海陰朝晞髮兮夕抽  
簪浩然同觀兮何傷乎予心

平一賦

洪思日子在詞林時作熹宗初東磯徐  
賊西殪水西蘭州安奢一賊諸悉平

冽風舉而螟蟪枯黃星曙而鋒距息聖人有道藪清波伏以理  
揆之不其然乎方顯皇之初載天下多賴命鉞三出薄震四屆  
蠻尸稽首鬻膝罔外迫於末年澤廣膏深柯稠灌密屬甲齡於  
鯢魚蕭斧依於爨室天下熙熙雕衣鏤食匪茹之民日步作之  
而忘帝德東西 暨趨見戒雖懷腐而就隨亦忘戰之害也  
觀夫董虺旣殪杲兕再發科勺之檻已送仰逞之魂重奪酌醴  
而注猩唇炳蕭而薰 髮於斯時也先丁三日顯皇方升蓋甫  
在旒冕之齡也維貽謀之夙張故赫怒而可繼肆於我皇懲愆  
用興殷憂乃啓思武丁之濬發感千羊之未替灑掃戒剔克詰  
揚厲騶虞張目而威猘鷓雛動翮以鼓鷹鷲招搖所歸轟竦  
電掣跛者爲之驟奮眇者爲之擘眎東試而徐賊殲西試而水  
蘭殪 洪思日子水蘭謂水西安邦  
彥蘭州奢崇明二賊也 蟲落之首聯於蟻珠防風之脛

結於象齒髓腦余吾之勢炙口成炊盾鼻崖顏之文逢足而是  
天子曰嗚呼此其小小者烏足以媿我皇祖 之事乎昔我

皇祖沈幾睿照武無臣而不勝文無微而得貌仁涵日斧之威  
義滿月弧之殼罔寺之駟糞其黃金束帶之儒縈其白豹動則  
衽席行師居則旨酒長道是以雲無礮車風稀篳篥圖列九五  
星陳四七不勞組纓而海西送逆大咤則 小叱則

既又十年英風益上嶽頓五指海平一掌甫鼓而清靈  
川再鼓而匡平壤接轂而 還棹則 陳繡不

缺於倉流水不絕其鏹於都赫哉維二祖之威靈故假溢而遐  
暢疇師武之不力乃東顧而多讓於斯時也播灌充庭迪爽溢  
署人筮寶龜家籌七箸醫巫閻之殺氣將蘇 之 何  
慮大司馬若念虎螭不懋熊羆逸制則或告以簡士致日立表

譙誓三千之試方叔二廣之掖楚子越踐臨期而三汰其卒魯  
起焚扣而再致其死大司農若念轉輸不繼泉貨澆渴則或告  
以營屯因地徵草就水公劉以三單徹田元老以蓄畚采芑棗  
杜之謀臧霸世充國之言熟人耳黃扉之內若念鼎不易舉材  
不再借既禮樂之未遑何樽俎之多暇則或告以南仲之城朔  
方吉甫之歸自鎬周旦踰嶄石之山召奭界盧龍之道異弩之  
驅羣羊雄風而嘯塵掃我皇上憑軾而聽之以爲洵如是吾可  
謝拊髀之憂受求宥之報也於元冬十月草枯霜結木弧折  
於嚴颯馬酪漬於積雪袴畫龜文帳飛綿叢山白義厲之魂海  
青 之血 爾 將斂樺皮灼羊骨攜雞兀反菟蝟延頸  
靡耳麋聚於巢穴之下蓋亦恫於我武將暫徙而避野七萃之  
士日射意跨坐舞不禁呼勇敢賈以爲是螭螭之林可投炬而

赭也然且天子愀然思肅慎之誰庭諮有苗之曷格旣同德而均施何豚魚之異責爾詩書所陳固得無長者而稱之乎於是元宰獻臣格人碩輔咸誦江漢綴常武咏雨雪之風按六月之譜合進而隲曰夫古之繩武躋聖揚休有光者豈必棘信宿之烈哉蚩尤鬼方之師亦或三四年矣所貴於治天下者明刑而刑不干明賞而賞不僭禁削炎帝之桐城佩秦昭之劍釀區中以流和總八荒而恫念非獨遺禽之失不誠於前亦龍蛇之奮時圖其漸也昔者倍棄養辜而貽帝舜文命紉澤以試允征漢文大畜而詒景武景武勦力以燕元成雖惠敏之殊致各因時而同紀豈謂前積者功收於善藏嗣振者德於後競乎故夫聞竽而思聚者鳩民之屬也鑿門而蹈凶者從戎之督也反身而脩文者主相之服也鳩民而聚聚不疑故有兩造之縣入金矢十家之戶賦鼓粟從戎而凶凶不愕故有顛頡之項借以威曼子之頭報以福主相而脩文文不胸故有霸王蹙頰於勝人上變捧心於伐國信三事之分趨良何苦於越畔苟外憂之未除又何果於殄愠今方皇靈旁敷天階無艾師錫駢蕃多士克配宵衣之哀鴻鴈葆旅之蠲狙獍老成焦思駟謨於內樞輔枯髯襄略於外丙魏合謀於丹宮楊僕潑刺於下瀨辛趙分奏於金城韓李明微於遠塞況又山 髦頭星渺貂噉屍而垂盡金易粒而絕少 之才旣竭 之部欲撓扇蘋未以鼓斷絲發號猿而臨驚鳥故陳傅之鋒可以不制而月支之 可 以坐駮也天子維曰都哉允塞克壯其是之謂乎吾今乃知七旬三年之異效而同質也於是元昊感禋神物游錫白狼去而銜鉤元菟來而貢職廟郤渥洼之歌丈翻海宴之譯蓋不踰年

而西賊殪 服尸咸自在城皆安樂遏劉之頌興太平之舞  
作重爲歌曰天甲昭旋明堂開兮義馭殷中燐何來兮巨骨長  
顛揚以灰兮尺咫之怒焉足材兮後夫逢凶天所摧兮梟羹無  
音不可懷兮虺虎仍執殲渠魁兮爾亦吾民無所猜兮宇宙霍  
清絕纖埃兮皇帝功高尚懋哉兮

雲霄曰  
同安

陸我嵩校字  
陳震耀

黃漳浦集卷三十七

詩

四言古詩

丁玉明者古之有道也歐溪陳靚夫凝甫二兄弟皆從  
之游沒身不衰今其子弟猶守敦篤有二生之風聊爲  
識數言歸之勿謂好學從師者之皆無用也

昔維元晦引掖安卿暨於子充實歎林子剩夫之起孑然無徒  
謂我有漳邈惟三士斯道不墜在丁玉明誰信從者歐溪陳生  
厥有昆季靚夫凝甫皆本醇德闇然服古不求聞達不慕浮榮  
服勞從師萬里於征大雅旣衰問學道喪誰以韋布而敦德種  
譬之農夫惟藝黍稷是耔是耘是寢是食惟其敦朴物莫之奪  
內本靜專不撼其末我稽古人亦寡與儔愛敬知能厥惟蒙求

少則云然壯老則不惟此孩心鬱若終古以眎仁義猶桴與鼓  
動之曰誠應之曰信非誠與信同室莫應我觀陳生乃思丁君  
行脩於鄉而應於國眾不媿朋私不媿獨宜爾後人續其初服  
甲申端午後四日張鯢淵中丞既平漳寇班師過訪鄴山  
與諸子餞道於東江之渚爰集詩歌先爲引端凡五篇敘  
別載

七建之山薩崇宵深滔德自天民生孽心 於皇張公鎮以靜  
默細刃鉅斤不缺不折 匪曰平之曰知厥情絕本反原使孽  
不興 雖有龍蛇共慕其血雖有贊虎共顧其穴 去顧去慕  
民乃安作潛淵拔地不改其度 用如不疑功如不居禹鼎倕  
鐘湛以詩書 矛弧是仗芻蕘是採亦矢文德乃儕儼海 漳  
山既平漳海既清綏以畫干而依磬聲 温衽義俎以保有室  
道津禮液而洗斧鑕 四方眎茲亦曰懋哉天子命公獲所樹  
哉微我張公雖有甲兵又曷怙哉

右十章一章至九章章四句末章七句

師武桓桓曰表江漢乃秉七德以戡斯亂維我張公文武是憲  
淵塞厥心器與道貫 念茲海隅亦服鄒魯有蠢不知如犢觸  
乳卷篳而嘯投竿曰舞帝軫不除俾受公度 公順長道以御  
雄略驩服驂不掣其楸狸首之來咸辭其穴 公曰念哉天  
吏逸德勿爲猛火以燼玉石巨憝既得皆安厥室人人廬廬子  
子翼翼 維公之來甫及三旬維公之歸夏初受春鷹鳩俱化  
醕醢皆醇田疇孔脩昨路是遵 公既飲至不留不處整如巖  
君暇若處女曰將帥力曰神明與我則何功而惠此土 帝曰  
能哉相我羣工莫如爾諸居圉且荒匪天降災爾有風力則吹

塵垢彼尸素者如食斯餽 何以錫公有馬有車元袞介圭赤  
誥金書雖有茲錫公殊未喜曰彼四海未有甯止 安得皇途  
既平且康蝨賊不生八蜡永臧公立帝庭扶中植央乃矢岡梧  
以鏘鳳凰

右九章一章二章章八句三章六句四章五章六章章八  
句七章九句八章九章章八句

倬此禹甸是秉文教覽轡不涓其末迺掉稂莠不鋤嘉禾曷蘇  
雖有油雲委之泥塗 維我南服豈曰荆楚蛇虺相師遂啟厥  
侮屢叛屢招匪類乃驕畜豺牧羊其鑿不遙 粵維張公實壯  
我鑰拔本塞源以贊於鑠順命者扶干命者誅無縱詭隨以恩  
驚愚 顧彼飛鴉安有好音烹蛇禦風不恬於心取民鎧草尙  
曰無赦豈有養魅以司宵夜 魚然之羣用死博活公曰弋之

取彼在穴一夫伏鑕千室鳴絃若彼羸生蒲不敢鞭 以公之  
憲式我邦國萬羊億犗孤童子牧世道將興則維巡方况爲長  
師以奠吉疆 四馬之駸六轡如琴剛柔載調以敷德音奇攻  
茂績則世亦有大人載道澹若元酒 漳江之濱而無彼姝魚  
膾膾香薄於薤菹遺公千言以雅以頌視彼來茲吉甫張仲所  
不敢云六月出車薄伐四方以匡王居

右八章章八句末章十二句

光天喁喁則維遠海馬童騰蹕以震方外帝曰靈之則維重臣  
帷幄之謀而消甲兵 無曰悍馬亦顧厥御毋曰盤節則視彼  
錄我有山子亦走萬里我有素虬亦蹈海水 爾往駕之勿隨  
勿追爾往參之以和以威四野將逃勿駭以鼓去厥害羣乃獲  
我馬 靜无遂心維公則能碩畫遠猶不違其經譬彼莠種有

相之道不以嘉穀畀於豐草 漁梁之山九仙之谿翠旄采旌  
而蘇貞萋降於漳江以屈梁麓友鼻辨髮無思不服 顧彼佗  
夫戮力於原載獫攻駒則操其端亦有罄控亦有縱送二八之  
蹄乃悉其用 車至徹微無堅不摧蘭表稻畦成行鼎鼎工安  
其肆民安其畔南仲召虎則循其貫 燕喜勞還乃及旬朔膚  
敏之功爲今古獨鴻鴈磬噉曰歸其家邊豆壺觴而揚斧柯  
江東諸賢有孝有德實頌清風以鏤金石皇路將夷爰聞是詩  
登於九天勒爲穿碑

右九章章八句

文德維和武德維斷和斷之繩則艤彼岸遼陽隕師曰維不和  
楚豫潰離曰維不斷顧此四海茫無其畔 世有哲人必灼厥  
因相彼病原而痾乃身不尸厥功不違厥馬乃從蟻水而獲其

野脩文德來繫長道順非獨標治亦曰本論 君子明功先廣  
厥心鐘簾在宮外聞其音戰勝在堂豈必臨戎 安于之嵯曠  
犢不下尹鐸之邑蛙魚所厠或峻或平廣德所經仡仡躋梁安  
知其型 鑒彼四方先悟厥敗碩人容容良士蹶蹶亂生微甯  
病加少愈實有毛倫眾莫克舉 高位易尊高功易驕廉蘭區  
區猶知本標嗟彼世人舉鼎絕躋益鋤以石蓋非其任 楚豫  
旣喪乃畀秦晉猶曰標治異於本論哲人亶聰勿輕鄙夫亦有  
翳桑以扶輿樞芻蕘禮樂而佐上 聖喪亂宏多則靡有定楊葉  
百發其的不競 載聞載收如雨農功寂然體虛乃與天通勿  
謂道謀不足與同

右八章一章十句二章十二句三章六句四章五章六章  
章八句七章十二句八章六句



青溪先生集卷三  
四  
繇求逸致其在農山正叔老儒樂觀垓下雖穆如之詠多慙  
而黠爾之懷不絕如使世道休明尙從干羽以誦歸昌卽令  
黎庶粗安亦脩鑿耕而忘帝力彤弓鐘鼓曠言一朝珥筆興  
詩邈焉千古歎夾谷之難從愁率野其何極式歌且舞我德  
伊何載寢載輿公歸未遠旣發綿蠻之音爰終驪駒之典令  
帳下謁兒能勝鐵綽板者奏此大江東足資撫掌云爾

五言古詩

庚辰五月二十三日辭墓就逮時緹騎尙在南昌中夜  
出門諸友環顧不及爲別匍匐至水口揮手謝同人惘  
然有作

買屨一出門灑血已萬里六月踐青霜千春沸楚水誓墓苦已  
遲懷湘毋乃始大海欲枯乾孤棹安得理明時驩齊誅到入巢  
許耳衡泌無安栖岱華鑿虎齒水鐵徑寸心灰湯百部史臣罪  
如傾河當於何者起親朋但道古引涕便不是危途心所經難  
負久自矢幸不當二人千勿語妻子

適中驛道別某某并諸同學二章

道人不決皆達者不揮淚懸崖千仞巔撒手得所貴生平少屏  
語臨難乃自遂疾雷破孤峰要非物所碎親亦不受憐怨亦不  
得媿虎穴曾高眠龍拏豈得避但非徑寸珠炤影中如醉  
日月有蔽虧風霆何所私明明一寸弦不爲晦朔移白手鍊黃  
金要當有試之桂火燒崑岡未變貞琬姿所惜廿年前不早事  
耒鎡女子一許人膚髮非親遺取水當就烹祈薪當就炊幸爾  
諸親鄰知吾耕織時

南昌江中別某某及姪止子

去矣勿復道寶劍雖不快猶及割蔓草去矣勿復云燹火摧孤  
松何必牽芳蓀男兒各自愛扶檣上漏舟決非力所至男兒各  
自謀爲善毋近名近名生百憂去矣且分手千年一瞬間石泐  
金方朽去矣且勿遲騏驎脫血胎安肯跽鳴悲爲謝諸倪髦當  
何相見期

以六月乙丑聞逮以戊辰別諸子前十日庚申爲先慈諱  
日

傷足猶未瘳剝手又重及冰鐵摧肝腸安能不泗泣壯年賢慈  
訓風濤度桂檝濡初十五載遂爲衝涵入杖痕不可捫指痛安  
得戢前月夢慈顏皺眉屢於邑攀持忽杳然攬被涕猶濕人非  
剖腹生誰肯赴其急已老白頭烏復念斷乳汁感慨古甲兵一  
坐爲十立安得還墓前風雷共呼噏

十三日癸亥爲家兄誕辰時家兄七十有二淵姪任子舟  
中

遠與集桑鴻志不在稻梁喋唼蘆葦間游沐日月光飛繳從何  
來四翼分蒼黃豈不樂徘徊收翻心已傷宛頸相顧鳴湖海爲  
悲涼憶昔親在時四畦少遺穗吾兄日拮据手口俱憔悴息肩  
能幾何風雲又顛沛經時變鬚髮枯眸老涕淚世間諸歡盤到  
我輒破碎周廬數松竹動影如夜魅馴兔亦已散慈鹿亦已瘁  
諒非兄所居家人各懷畏倘可留餘年開尊定殊慰

已別諸老而彭達生欲送予繼揚辭之不得

此酒不可勸此檝不可擊大風吹赭圻一夜化巉石從行六七  
人各已掃去跡病鳥無勁枝毒雲無健翼區區碧血心恐非世  
所識季布重新交魏舒喜疇昔才與道難兼名嘗與命敵麋鹿

好仙羣故爲豺虎得况已負矢奔跂足何顧惜青天圍曠野亦  
欲省矰弋剗卻衡與華卽爲平界尺擲斧割危巒吾何愛腰脊  
生平禮孤影一旦破絕壁大鳥夾青蠅要未謝弔客感君骨月  
交凝睇乃脈脈

再示同學二章

吾聞諸夫子仁人無死地呂梁蹈輪波焦原出焰熾當其厠足  
時與衽席何異苟復知忠信卽有水火意兩者比疑間焚湧不  
可避古賢治精神皮膚非所治顛血得金腥味骨得玉氣所有  
諸灰礫烹鍊了一致龍比生陶唐禹契落二季膚體各不尊毛  
腋安足貴况彼溝中瘠輾轉欲羹沸而我委紳佩如鳥與獸眈  
上乃愧魏闕俯乃愧苦次引艾坐醫門剖肝爲納計徑寸獲所  
安千載謝吾事飲水觀浮雲採薪贈當世難易心自知不在隱  
與吏衰鳳未易毛傷磨不綴巒區區蹄毳間日月爲決背倘逢  
尼山人爲雪尼山淚

疾雷破寒山凍手裂鳴琴俯顧床頭雞風雨無殊音人生非松  
丹奚忍自浮沉中田一號涕象鳥知其心澤畔行哀歌魚龍爲  
悲吟豈不樂南薰優游披素襟乳血在君親霜露不敢侵悠悠  
行路人安足相追尋澗水亦已泓入海方知深泰山爲物宗非  
直有危岑神明集眉端百鬼伺其陰臣子無他能微誠聊自任  
遂志爲骨山委命爲肉林總此未墜生呱啼亦古今箕文垂襁  
褓後死其縫衽穹途結細績北極通磁鍼豈必呼市師爲牽覆  
足衾行矣加飭餐此道未覩霍空言撐天地星斗何蕭森遠爲  
萬里鄰近爲數尺涉形景雖參差夢寐猶能謹慎勿辜鱗鴻寸  
楮千黃金

偶有屬詠知已動色以爲非宜復作此謝之可謂揚美止  
沸矣

貞父謝文綺不復造桑下豈不念蠶飢筐篋久離舍貞婦甘葛  
絺不復思屬纊豈不念霜寒温煦非所尚漆室諸姊妹纂組皆  
鍼神欸勉分素絲手持心不親黃鳥啼我前蛺蝶繞我鄰掬水  
爲朝餐鋤麻爲暮薪姑姊惠一簞一篋十拱壁此意豈不嘉孤  
身與誰適解衣覆薄帷宛見諸繡鴿亦有羣鴛鴦掩涕思舊服  
我棗傷故園斷機觸前緒共此幽人心抑鬱安得語東家少女  
兒十五爲姑嫜襁褓畫飛龍珠翠填下裳西家宿留姑五十爲  
少婦繫華白鬢間翔蜂不忍去姑姊勿復云隈牆恐有耳採花  
莫採刺炤鏡莫照水東西牆頭烏長嘴舍利齒寒莫從狐栖飢  
莫從雀徙病莫從蛇醫苦莫從薺理有命縣在天誰敢信吾是

集木篇

此篇應入  
五言長律

悲風懷曠野集木想其人天地龍蛇蛻冰霜奴僕身窮猿存舊  
侶創鳥得新鄰豈不愛多暇其如交始屯安危秋望葉枯苑岬  
棲蘋踵息三分力道心徑寸塵穿巢看石蹟爲釜祝游鱗滋懼  
傷君子微吟動鬼神觀生鈴響急思過雞啼眞入累緣無學還  
脩倘未醇疾雷開朽樹燹火曝枯筠非昔之高躅從今知斷津  
餘魚尊餌細野雀逐羅勺廉靜猶防物垂崖况絕綸楚嬰箴婢  
鯨晉傅謝恭申造化耽攻玉产台瘞輪散才驚匠石泛梗滯  
孤臣義命參商久權輿河漢頻鷓鴣輕一葦鴻鵠墜纖倫後死  
斯文怪先生遣行嘖黏竿童子試射多罔工親捫舌聽鸚語磕  
頭望虎蹲敢云高視下莫怨病貧齧膝未稱偃巖牆亦擬循  
終年歌小宛水谷事千春

哭魏倩石

崇禎十四年辛巳六月望日己未前翰林院庶吉士改  
兵科給事中直言降補光祿署魏老先生卒  
於京師一時名賢哀號動道而道周獨以累臣羈繫請  
室不能身贖踊僻莫聞嗚呼傷哉自去歲五月道周聞  
驟徵捧檄辭墓中夜就道公牙車下至廬墓執兒子  
手揮別草屨又走二百里及於水頭告誡諸朋友僮僕  
凝涕遠望凡四晝夜目不交睫  
及善者公也而公  
今安往乎公旣傷僕就逮形影一子然塊處無疇昔  
朋從之援又以生值明時時覆蓋之恩不敢自爲倣傚  
蹙蹙入都冀一旦得推鹿車與杜伯山同誼而竟以憂  
傷惘然蚤去嗚呼痛哉天下之可以死可以朝夕死而

哭魏倩石

崇禎十四年辛巳六月望日己未前翰林院庶吉士改  
兵科給事中直言降補光祿署魏老先生卒  
於京師一時名賢哀號動道而道周獨以累臣羈繫請  
室不能身贖踊僻莫聞嗚呼傷哉自去歲五月道周聞  
驟徵捧檄辭墓中夜就道公乘單車下至廬墓執兒子  
手揮別草屨又走二百里及於水頭告誡諸朋友僮僕  
凝涕遠望凡四晝夜目不交睫手不輟筆者公也而公  
今安往乎公旣傷僕就逮形影自弔子然塊處無疇昔  
朋從之援又以生值明時荷覆蓋之恩不敢自爲倣傚  
蹙蹙入都冀一旦得推鹿車與杜伯山同誼而竟以憂  
傷惘然蚤去嗚呼痛哉天下之可以死可以朝夕死而

猶未敢卽死者獨黃道周耳以公之才掌華蹠河支厦  
鎮農樹百世之業包帝絡王與召畢永年何所不可而  
顛躓明時與駱賓王齊齒又抑鬱不得爲天下所嘆嗚  
呼傷哉天耶人耶道周既不與哭泣之列又義無爲位  
之處僅與諸僮僕撫心幽慟猶恐爲扞掖所窺乃裂素  
旒附以長言倘九京之傍未必辟咄或有胼蠻致其悽  
愴也

麟數何已奇鳳冀得巨創况此龍蛇年渴爲真宰用岱華自觸  
膚犁面目相向鄭僑傷尼翁祁老動叔向人道旣蕭索風雨失  
悲壯皓霜下六月迸破青雲嶂疾雷摧孤山亦喪達者邈古人  
豈不死要不蹈青妄錢彭信厯德逢比亦危唱蘧瑗雖暮年鱗  
史何所讓俛仰宇宙間如一鬼食帳龍鮓不再飽馬肝亦一餉

唯有仁與孝可爲淡醢醬夫子本慈衛進退得義尙當其意所  
赴樂葛豈足抗朋射知舒長窺井邈袁量淺水無巨舟涉波忽  
已蕩世岸方圯頽衣袂安所放豈獨附螫者啟口無適仗墁師  
盡天下所泣爲郢匠鮑叔旣已亡管隰坐彫喪釣孰與爲綸狩  
孰與爲韞飢孰與爲餐寒孰與爲纊萬一我遽死又誰收我葬  
帝子皆精誠九巫悉虛誑萑茅屬莽草筮與固不諒已洗青蠅  
羽足禁大鳥吭旦夕行赤霄莫作白虎况鬼神多嫉妬魂魄易  
蕩漾千古敬靜丹九閭膚敏狀文孔諒猶在冠劍亦聞閑步趨  
未傾灰履視何不曠微言排天紛眇語解帝障尙有不適意雲  
絲足下上吹塵見城郭鷲御自跌宕憫此溝瘠人抉彼譏讒塊  
舊交有張理顏蘭亦駢麟榮瘁共寶惜明滅各條暢膚髮對尊  
嫜兩啟幸無恙卷淚謝牛醫逍遙約雲將生死信何別寤夢遂

曩羃浮沉在岸谷形影隔芒碭所有諸詩書兒曹久標獎親鄰  
失縛節槩不入元勑萬里射駒隙累割神逾王白月東窓開青  
潮荻港漲誦有鄉人碑記有柱下藏飛鶴來島間孤雲與之迸  
杳然若收涕欲挽未得當生當從婦謀日夕就函丈死當從親  
依綢繆祝嘉貺生死未可期恍惚此惆悵

宋子建兄弟過訪大滌山時何義兆攜姚有僕朱康流往

勸棲真子建據梧獨觀康流所著三易漫成數行

靜者喜專居遊神湛百籍當其意所都十城堅雙壁文字既易  
窮神理何所宅遠示諸上索恍惚龍馬跡不知羲皇前何必表  
金石周問亶聰明鑽仰無所得當其廢餐寢必不爲褻績多識  
關姓名多畜關道德兩義既差池何爲圖前畫緬想回賜間跂  
足但太息

### 宋尙木過訪

宋尙木過訪大滌山攜經濟文編四百餘卷日繙其目  
不復能竟也信宿欲別草草書此謝之

大滌旣東注龍蛇享鐘鼓星漢浸其波日月爲歌舞七朝諸名  
賢吐辭如芳杜委蛇及千年著華又布獲吾友夏陳間稽古卓  
自樹同游六七人各復奮高步閱覽包淵山脩詞恥章句盛明  
五百輩一一與之遇蘭芷生衣裳烟霞出毫素雖有千鼎鐘不  
爲易所慕幽薊尙弓馬當塗寶紉綉區區諸子心俛仰傷叔暮  
彌縫欲其淳繫馬安足顧

戴初士爲予棲遲江左草草書此勸棹西還并慰諸知我  
憶與諸名賢乘風過樵舍危帆不相接揮涕白日下鳶鷗銜魚  
蝦對面相顧詫匡雲不敢留鐘岳亦惟卸洪濤變陸海蒼茫動

晝夜吾生等毛髮名義安可借所慮諸名賢鬼蜮坐彈射愛憎  
友親戚水火避掌蹠所賴天精靈胡尾未狼藉鼓棹歸大江岸  
谷猶如昨寄語親交知勿復重畏怕

贈呂漢憲

人才不易得似爾何清深見爾大滌山微言滌我襟斯道未全  
彫遺緒猶可尋語孟垂日星虎兕安敢侵清明苟在躬雲霧爲  
破陰洪濤簸天地北斗無浮沉顧影行空山鬼神何蕭森取君  
明月珠投我滄海金一言鳴素丹賢於千鳴琴聃耳明人形僑  
札明人心柚橘各芬芳非慕眾所欽墜雲爲德波落葉成道林  
努力事清時莫如我不任

錢聖月世兄清切屢見於詞用韻言謝

韻士今不少君獨稱善鳴揚芳出真烈振筆生華英璇海流珠  
波其源浩以清纂組不足爲雕蟲古所輕觀彼朝槿花薄脆如  
春水何況從少年俛仰弄浮榮古道雖孤危百折非所驚眾詠  
齧風濤猶不沒堅城三代有緇衣好尙何其貞感君投雅言抑  
才陶至情

答郭彥深用原韻

世道少法拂他山託寇虜下士無遠猷中夜心自撫古人重移  
楹舉酒自勸柱積血不忍瀉往往侵臑腑雪窖成焦原繫狙爲  
雕虎豈有大纛車可恕蟬臂斧尤悔生所招感慨徒懷古賈賦  
與楊辭鹿鹿投湘澣賈生毋乃躁楊雲失含吐吾道本居簡亦  
藉世知阻太行不可移龍門安敢怒已掛神虎冠卽與市門伍  
濯足謝江神洗眼望二祖補浴豈人功扶持還泰宇眾鳥翔朝  
風亦爲義駕扈屐齒與杖頭各自勉支柱名教依介立軒裳等



鴻羽車航既破裂定非繩所苴油雲一線生膏澤萬里普此道  
視良朋努力事明王

壬午七夕題於三宿巖

懸崖不可涉琴響何溟濤洪濤撼鼉宮素虬爲哀鳴伊人豔相  
違兼鼓白日生非女與牛安能相偕行帝子喜參商心昂離  
二京偶爾棲河傍可知非淫朋謫罰心所安難爲百世稱東公  
起泰岱金母巢華庚兩家集帝庭未必傷和平阿閣棲羣鷺鸞  
鶩餌瓊英大呼如鐘鏞小呼如簫笙一朝聞風雷巢鷗遂縱橫  
梧葉摧頽岡蟋蟀爲弟兄鵬鳥嗟爾來蹉跎中怔忡羽翼不得  
齊伯勞東西迎仰視雲漢間波浪何轟鉤爲橋諒已難方舟無  
乃輕所恨諸襄章不得自颺賡錯處箕斗間貞良難爲名漿酒  
一簸揚龍脯味豺羹辛勤諸女兒蛛絲終夜縈豈有結網羅而

當帝子情勸爾停茶瓜一石與一松一瓢與一觥米汁歸齋宮  
翠篠環楸枰上不爲列宿下不爲長城逢山一巾車逢水一葦  
桁問彼支機榆宛如枯草莖寄語諸星辰何必傷零丁

篇中有脫句

別節之兼慰諸友

牽舟出湖口南風正清發楚客欲泝江懸眼射帆末松陵忽已  
過咫尺吳門達梅尉不可求梁鸞亦超忽自顧形影間沉沉成  
何物手持雪堂詩但爲嘆奇越英年已感慨吾老安足惜憶昔  
十年游胥濤兵衝突買舟入包山坐探林屋窟相知三四人各  
已落白髮搖漾獨吾存又當弔賈屈黯然問精靈毋乃喜勃窣  
節之貽吾詩十章太清脫緬視十年前精華猶未竭灑筆睨古  
今鐘鼎如鷓撥慰我慎眠餐誨我善巾襪出入謝風露晦息審  
明發古人感青蠅知我難屢揭幸有好同堂吟嘯相頡頏堅石

久未磨蘭香老未沫放浪遺形骸瞻眺留日月安知我所歡不  
復勝簪紱魍魎亦畏人山水亦護骨不作悲離聲不著窮愁筆  
不蹈辟支禪不弄飛騰術蕭然寄天地風雨絡膠漆寄語諸先  
生勿爲吾愁疾

沈鄰秋追送語溪數行識別

宇宙旣蒼黃相將唯名教斯道一以頽鐘鼎千不效瓦缶雖適  
意安可格清廟白日卻龍燭燐火遂騰叫管晏百里才申商五  
毒料亦各當其時非爲不精妙吾倘信迂闊師孔失練要抱膝  
未安坐猿鳥墜悲嘯對面落銀河化作泥與淖非無陋巷琴所  
乏市門調何不臥土室掬雪自相照幽居瀉石竺盤水澹清釣  
出入攜所親泝泳豈高邵有時買雜綵亦有薦草屨明發懷二  
人青春展危眺劍寫謝明公風濤贈野棹立言豈在多龍德自  
隱曜此語非至人聞者鮮不笑安得夕復朝與君探道竅

涉江行寄諸舊識

涉江采芙蓉踰湘採蘭芷豈不畏魚龍所愛貽君子芙蓉未吐  
華蘭芷未抽英豈不畏江寒所愛清且盈江湖旣翻覆蘭芷傷  
寂寞美人行無家牽羅補茅屋桂楫改爲薪蘭舟留爲炊君子  
相指唐野水漸車帷袖橘雖芸芳化爲蔬與蕘覽鏡炤綠苔一  
日刊雙睂中年旣如此薄暮安所依然香濤江神褰裳拜湘女  
蘭菊生春秋天地變寒暑豈有齒蒼身獨與淖泥語拔身謝七  
襄尺布猶當織瑩瑩白榆間黃姑舊相識下爲望君山上爲支  
機石精誠石可穿風濤何太迫

郭正夫文宗構尊經閣詩以序之

昭漢信在天經書尚比屋四海爲魯殿側壁動絲竹輓世尙權

謫稗子散醇樸遂以申韓言強為堯舜讀津梁溷三豕搏觸競  
五鹿阡陌開儒坑椎埋覆公餗刀筆旣可師孔顏安足錄哲人  
察其端喟然念明倣遺編事直韋周鼓發逸璞譬彼開河山不  
敢後嶽瀆根源出藻茹餘實被百谷五曜循星榆字彗乃攸伏  
王者司天彝康回守地軸不以罔象珠而泣鬼神粟不以妖鳥  
符而起龍蛇陸世道雖鼎沸吾學未掌覆豈有麟鸞皮遠慕皤  
虎腹弓馬多健兒如噉屠狗肉俎豆一以羶箕壁為跼蹴仲尼  
值戰祭自矢得勝福雖不躬膺懲諒不至凶刃所以七聖人未  
肯渝尺幅敬簡師德心清明為道目干城寄且免長算坐帷幄  
吾鄉諸老儒頗亦事追琢鄒魯五百年風采尚新沐一為過者  
存後至各先覺聖明表六子引鼓導正鵠此意非區區要使羣  
醜服先生秉文秘遂與六子續以爾伯夷風煥為多士勗非獨

八州登允矣九閩燭

讀郭正夫集并觀校士有作

一作贈宛  
在堂集

斯道失崑源文章少淵海騷雅雖薄技亦已湮其會詞林屢喪  
七鴛鴦雜絳繚隆萬不可追花甄漸蔚薈未子本英雋矯然發  
清嘅投橐為典客離車未改佩龍夔禮樂親岡梧雲物藹鳳羽  
貴孤鸞豈必逐鷓隊球圖在東序斷不吐光恠辭館授職方巍  
我重先輩相史挾廬兒恍惚見異代要以扶化柄不為眾草穢  
日月自中天星辰無面背巨秤出袖間雄風播海外約此元冥  
籥以作昭明鞞藜火但一室若華乃四屆金箭收下陳齊難集  
鉤帶異文盪古竄新響突地籟鬱彼寶樹燈靄為五雲蓋弟子  
三萬人一一躡珠琲睠昔諸同儕奄然託糲糲持踵坐曲室如  
搔經史疥出門無車帷側足見欂櫨清晨須眉心白畫花粉醜

高抱渾沌鏡竊照疑殊態因之解騰角不復憶舊悅纏綿于羽  
意踈踈千秋旆噓氣蕩 氛餘閃破曖曖陋矣馬蹄間錦漆擁  
口袋以此眎東觀何異鷓蓬艾諒有姬孔心各得鐘鼎在

三山林守一入萬松關有作見懷用韻和之

山川愛嘉客新意動軒翥每每欲拔地突出爲人助半壁絡羣  
峰江流不敢去豹隊方陸梁獅子忽頭踞神人相咋喙乃稍就  
部署平疇三十里鷄犬寂皇遽風雲自一肩不與戶外攄白首  
遠行歸指顧辨其處橘柚初締花香氣重撲絮褰裳度阡陌不  
復見深阻諒彼共滔前頗亦閉闕於遠事輟纏綿湛然發神慮  
鷄鳴榕樹顛青海澹星曙幸有千里人抵此千春語

率爾別陳宣公

相別已廿載吾初無所得見爾素服膺祇在能靜默奮筆凌霞  
霜援機碎敵國嚼齒飛于鉤自知不得力聃耳觀蒙俱能復有  
態色文章視雲根引彗掃晨夕至於性命間杳然失蒼碧楸梧  
亦我師鷓鵬爲我翼斷簡尋伊臯無乃太逼側曩老使守關蒙  
莊爲狎客要於敬簡居確不爽尋尺此道何有哉於爾見遺則

送宣公還三山

宣公秉淳德冲邃平三淵讀書本經史探索窮蒼元退處虛無  
間達者不敢先似欲反才哲鼎俎於自然世道貴脩姱扁跳爭  
輕儇安得練要人與觀羲軒前以指當闡揮正容如着鞭相去  
數十步星漢垂宮懸食當與之游出當與之眠此理不可期筆  
舌徒熬煎何當爲塵塗漂鑠金石年

查毅齋將還錢塘寄懷其弟伊璜并示彥升康流諸友

屬地斷青虹垂天見投蜺驪龍乍失珠風雷動閉噎草昧呼真

靈猶未覩英傑令弟何慨慷礪齒欲噉鐵解麾超謙旗以掃莽  
草血握別能幾時鱗羽俱橫絕鍾陵道路長老驥服跛鼈安得  
兩虬螭化爲雙蜻蛉陸顧多弟兄管隰相心舌白板獎王室藉  
茅起天闕兒曹命鄧竇下走得樂葛顧盼三千里邇於半戶臬  
何當爲醢鷄相對坐嗚咽

癸未三月十九日再至蓬萊峽歸舫偕者呂而遠壇張勗

之鍾鎮樸瑛魏心尙習江虞隲粵仲放曇追遊有胡仲求

諒侍坐有賦

刈蘭不刈足移山不移址九載畔離心今復集於此松颺淬鳥  
髮石影激人齒竦鳥憶舊琴驚濤尙夢底拾級逾迴互轉壑或  
疑似中年百不支所藉一筇耳泰華久破碎嵩霍亦泥滓拳石  
躡肩背猶未失鄰里况有諸丈人粵窄偕孫子豹攫旣我助龍

擊復予起斑草享台雁殺饌薄女几便不翦茅竹可以倩堂祀  
雲泉無新故畚鍤漫議擬豈有讀書窟溷於公超市煮石尊妙  
方藝芝採逸理所貴各有得不爲精物使赤手搏崑岑白汗走  
江水小結一榻腳遠勝五嶽峙豺虎蕩乾坤魚龍散藻米安得  
千歲人琢此數尺壘洪澤未翻前孟門未蹈始縱有神禹功不  
及旅人矢當時遂懷襄萬類同浮蠹安知巨靈蹠尊於圯橋履  
俯仰發浩歎纓流幸清泚巢顛今未非穴墊古未是但使同心  
人共啜洪濛髓指顧六六間一一平如砥

翁呂宗屢共游因寄數行壽其尊公祇文

世道有叔季人心無晚暮達者恥榮競所秉在高素抱膝事詩  
書散懷寄庭步風雨停小車陰晴問芳樹時時探湖山湮波澹  
逸趣况有佳男兒清舊包古度蘊藻及明時席珍獲所遇吾游

雖放浪折枝屢相顧從此識庭訓并以摠情愫

陳令威中丞守關外撫薊門綢繆甚至以義州款議見左

中樞每念往事為之慨然予亦以爭義州賈覺率率書

此不盡興懷鄭白麓本缺此篇  
從大滌面書補錄

仗鉞出國門大將不中制况復當危疆豈可等兒戲義州抗西  
遼京輔重左臂壯哉陳中丞孤軍審其勢剪棘開營屯絡繹漸  
布置唇齒藉松杏牙角樹幽薊一以探虎穴一以絕狐竈正論  
駭邪鬼竈議從此異欲賣盧龍塞遂翦涼州翅尺檄徵中丞金  
縉謝 騎義州既不存八城遂以棄堂堂經遠猷反為介 忌  
湯豹不敢築葭蘆坐割界傷哉籌邊心中彼偃月計長城日云  
懷儻功何可異信有干羽謨倘亦念三季

陳彥升舟次追舊示其弟次升

漢唐都關中終年事隴右豈有燕雲都中朝自為守遼瀋初破  
壞河西猶輻輳竈前少卻敵錦義尚如舊道謀不可齊但為款  
所逗參虎使虎驕教猱得猱就棲遲十數年衣襦日以漏蓬蓬  
萬斛舟蔽以小衿袖彥升有高識出關相厥簇折箸告中丞綢  
繆事輩後竭力為守謨焦昏道欵謬不獨二仲淹亦復百純佑  
負乘在中樞巾幗自致寇聞但誦經反為達者咎胡銓坐陀  
罵遂陰授中丞旣玉碎太史亦蒙垢雲雷網白日魍魎行  
清晝以此林鶴軀託彼梁鵲味極目視中原憂心為孔疚

偶書寄陳令升

神州信陸沉吾徒何顏面以彼覆杆安化為先集霰天子亦明  
察而愛羣奸煽蚘螭食腸胃終不獲所戀初以拚飛蟲究使龍  
血戰告者日以勤譏者日以倦災管不足懲赫梁恣雀燕銅駝

偃深草薪麥上高殿九鼎繫一絲江河細如線大興片紙書  
於十日電野老扶杖觀奸回手欲顛壯士揮雕戈健兒拂筈箭  
文人集敗鼓老媪染赤錆所貴日方升不獨雪見睨躊躇仰明  
詔揮涕濕素弁

### 東山偶書

垂老談爲仁了不見精微緬懷七尺軀膚髮蔽天地斯民旣顛  
隳骨血安足恃抱頭入林莽亦與狐豕類况可負日月而竊鬼  
火氣管子膠目時已得禮樂意宏才不可遇季路亦其次孔門  
道成人於此無二義蒼黃旣可參生死何足異顏回委陋巷正  
則蹈水瀉當其并命時要一無所繫須髮懸華嵩省睫照百世  
試問古仁人成就無乃是

### 寤言二十四章

代序能幾周羲皇倏已遠宛華亦吾徒得道豈不晚空值瀨氣  
齊遂執天地杼廣成初少年噩然爲化本沿時守澹漠其意亦  
凡近羲皇與之游聞教但婉婉古人貴至德不貴明聰曷以此  
循帝崖億載忘餐飯

民俗方淳庖畋漁毋已烝罔罔與緝絃哀樂遂浩浩六佐不敢  
諫五龍芥迴抱庖廚一以充鳥獸厲牙爪想其生已久決塞從  
其道豈悟後世人人犧委藉草

觀古帝作者一一師昆蟲其智不足師愛惡以相攻遠人者時  
全近人者時窮龍鳳爲雞豚安知庖不充所惜彼靈龜謨爲神  
所憑不如蟠腹君咄絲長林中

哲人起禮樂意思何偪卒抽蠶未及衣遽以被琴瑟豈不謂後  
人保此無飄疾吹塤歌扶袿撫掌迎日出皞皞畫地中遂爲萬

歲律嗟哉千聖賢猶未詣其室

天地寶易簡變化行精微六爻二乘之鬼神知者希生爲上帝  
心手差日月暉星辰眉睫間開闔安敢違禪泰書云云昧遠知  
是非現有赤練圖未能測所歸回賜待仲尼隻字驚崔巍想彼  
金烏明瞭然稱忘機

曠矣邃古初何會知粒食塞兌寡所營翔行無喙息暉氣充其  
中霞玉益顏色一有厲山農遂長千智識渴有不及泉寒有不  
及織雖解毛血憂已鼓漁畋翼雄者飽糈梁雌者但偪側俯視  
田畝間亦已生蠹賊

來羲十五世蓋未解醫道一讀太乙書慨然傷其躁疵厲散深  
醇元始成末造日遇七十毒此意殊悲悼至人慎長顧因貳遂  
明報豈不識服氣可以資遠到畏彼後逸主縱心奉引導所以  
立方書綢繆得辰告

治亂古相乘征討安可廢辜黜及鳥獸已自翦殊類兇手敗天  
方於義何所愛想自燧巢來接手闢草昧媯皇誅共工廓然起  
敵愾莫云伊祁年爰始討補遂

炎帝生神靈亦學老龍吉三辰備言語蛾子窟時術不知悉諸  
翁何以得教益至道卑乃尊至治簡乃佚高矩在老成危坐亦  
吾 燭火成日功非必避日出

眞宰多憂民所以重耕稼人知禹稷功明德食天下不知九井  
間再世爲司化亦歷三十帝禮樂播時夏陶器易汗樽腥膻從  
此謝豈悟太樸雕畫衣將玉笋

文明在中天有熊舉其最同時六十聖繚繞與之會先後命七  
相追琢極函蓋雖云啟方且驅策中利害今世非無才錯置各



顛沛稽昌為履烏蔭高為劍佩若明為杵白岐雷為艾介卽有  
斐然觀已各救其敗神哲問精微視渺欲透背握極命星光凝  
然制無外五要不可窺披圖發浩嘅

昆臺初息鬪投策方嬉遊四方生鬻心一日叛數州絕轡始再  
頓解冕為兜鍪中身五十戰甫有甯諸侯至治安可常至道安  
可求刈莧逃爪牙元珠如浮漚所重天明功未寒先庀裘大君  
無吉凶日月靡所誣靜正持乾綱四海生春柔

沮史渺難讀圖緯何恍惚想其纘羲皇以易命日月羸縮靡所  
遺因之定秣律丹烏於焉鳴龍書於焉發豈必鑄神鏡以照人  
骨髮曠矣素問篇影響見秦越

皇人寡異尙道廣眾所託一自表神智遂不及淡漠世王談軒  
轅何殊里社釀老者尊眉須少者事綽約白日為變化仰首問

烏鵲安知大填翁此意猶未鑿

拔世出戰爭元風已不靖屈軼生戶庭疑竇起四聽栖鳳與遊  
麟毋乃亦為佞所賴盛德心廓然成順應不為瓜距搏不為奇  
采騁投金還荆山藝竹還嶰徑鼎足生鴻毛捧蓬謝七聖念彼  
豕鹿動儻亦傷凌競垂手視裳衣固未失其正

貞朝不可慕勿嘆陶唐時陶唐為渾皞警洙無澗淄邪正方殺  
陳忠佞同孳孳世族秉化權何暇詢茅茨側陋雖升聞亦為帝  
胃者青鶴鳴藪中誰能知雄雌

陶唐諒猶可小大各賓進梯榮及世系選德及寒畯老者錄其  
名少者策其僦包荒底九載良楛足堅韌自非湛文教頑鈍彌  
禍釁以此師歲功序成得餘閑

如天想巍煥孔老思精微為上能寬仁昊蒼良可希沈然銘火

德貫月生辰輝喻彼君臣間安能測所歸鱗介溷居巢下民亦  
不拜諒有浩蕩恩上帝爲霽威

徵符在仁聖了不關禎祥重明來漢朝海內方披猖甘露承赤  
盤澹然如水漿金壁紀化元淮易猶荒唐不如璇與璣辨程爲  
平章不如疇與咨景慶垂明光滂雲生棟間窅若棲石房安得  
偕赤松與之聊徜徉

古今齒禪業端不自堯始帝摯爲神昆遺世已如雁手鑿四海  
璞以授放勳璽至人外日月何況變生死倪缺三四翁慨然揚  
其糝不命許由面不提巢父耳天地未成平逃曠將焉底菁華  
已垂竭吾自飲吾髓傾雨下江湖何所著水萍此道在圖籙後  
人安敢擬

神明治家秉幽居相講求巖壑諸曠人安知古春秋岳牧重教

化草澤通競絳都聚旣以成勢不甯諸侯猷畝得天下豈必興  
戈矛聖人善因時因風爲苗蒐因之翦巨凶百族安其區不肯  
說夢卜開海納洪流但云雷雨功已當千咨諏

崇正多曾薪洞川多曾鱗君子秉虛冲四顧多瑋人重華爲魚  
販七友皆嶙峋尙有州支公及於石蒲民貧窮無禮樂討論何  
所陳日月自週天眼耳生其身救世非庸流歷艱苦不親華貫  
十六賢聊爲鸞與麟負輓登長途胼胝心知辛

寶露滅雲壇淳風猶未散明刑每致意此道豈救亂少小不自  
得覺有輓世歎興作信拔俗動止自璀璨具有羲皇質豈受傲  
遊謾神禹防逸心斯言未河漢

二八各邁種底績維皋陶人材良已難荃宰誰久要瑚璉未可  
珍况敢崇漁樵當時貧賤交無一登熙朝善卷非不賢鄙志在

宣驕鳳鳥不攬輝孤鴻安足招

曠哉五百會明良萃一時大禹雖神人後輩遂罕儷天工妙已窮帝精勞亦衰日華麗九州冉冉爲崦嵫伯益開西秦皋陶行吞姬維有元鳥孫巍然得所師

雪後觀山中出雲

梅蕊自宜雪孤雲將安之白鹿有去來巖岫多傾虧達者鑿混沌藝竹爲須眉上有肉芝翻下有香乳垂新徑迷樵翁舊窟誤元螭霏微一縷間王屋看將移鉏耒與斧柯亦復何所施登山採琪花當及清明時龍蛇直元冬諒亦懷其私勿以浮游根徒爲談笑資

奉祝入會稽閔士覺見贈三章率爾答之四章

神界三千年中間十八姓當其騰簸時嶽瀆靡有定玉柯溷野草香草雜泥湓血者爲奔河豁者爲嶢磴不獨堯舜憂三皇已

競病禹王所疏導不過其庭徑龍蛇放菹海虎兕坐幽且猶有仁義心不能變梟獍始悟尼父功亦與神禹並橈錘開詩書環轍啟明聖雖未踰江漢已爲四海鏡安得神禹工巍然保其盛尼父衷星河軋然從斗柄清者自爲流濁者自爲凝膏血通精神萬物保性命草木生肌膚毛肱安股脛龍蛇從子遊虎兕消陷阱縱不題春秋日月自爲正鼓腹歌義皇子豈敢爲佞

慨然念宇宙河漢生弓弧日星爲之彈四海爲鷗鳧安得天地仁長生黃與虞蚩尤不肯降防風於何誅秦鹿餐麒麟胡狸攖鷓雛大鼎鑄神姦得無滅醇醜堯裔存關中亦三破其都棲遲一兩載收削還廉隅唯有典午時五嶽如擣蒲導安亦吾輩蹇產追夷吾世豈無毅單不過猶田狐猛獸踞虎頭溲溺霖其軀馱馱走千里往往充庖廚哲人秉珪璧不肯從屠沽買楮賽江

神畫壁爲皇圖黃河一萬曲卷栢翻斯須安能係小舟而從龍  
尾趨滄夷知我心弱水無元珠搖頭問靈威扁跳非丈夫天地  
會平成亦非人所謀稽首告上天皋益何區區  
騏驥自追風感恩則已淺亦或有癡氣欲共日烏棧日烏自上  
天騏驥自成繭樂駕與鼓車垂耳充閑選見者爲揚裾要非心  
所善問驥亦何爲頓足微流泣自昔穆皇時四海何博衍毒蟒  
一噴張陵谷遂傾填四蹄不可開孤吻爲薄韃回首顧其背箠  
烙如苔蘚嗚咽問九州無非禹所畝猘獠旣已死屬鼻旣已冒  
朝爲一掉尾頓使天地殫神鼎多遺奸龍蠃少清辨巨跡或不  
到乃爲一勇褊五子能賡歌瓜面滯馘讞澆瘴彎長弓元凱不  
得戩嗟哉九日烏臊十翠釜鬱何如走空廓健倦與雲展安能  
係束芻總轡於石絃

世自有高人出言如洪鐘知子入海心不爲流潦宗琴高負赤  
鯉王遠舉班龍大兒命泰伯小兒呼仲雍種蠶何喬耶狐裘而  
鬼縫私心爲報仇卷尾如雄蜂鴟夷與鑄鏤半繫於心樁一朝  
毒氣散岑溼歸窮冬浮沉五湖間沙草明微踪安知古聖賢變  
化多春容夷夔爲韶簫巢許扶脚笱妻子日周旋親黨無殊凶  
遺種溝壑傍各各生芙蓉脫然日月陰比戶安可封朝沐昆明  
池夕宿三茅松焚香酬子姬反唾謝干逢何須鑄黃金強面爲  
人傭覽君秋興詩鬱鬱悲高春

題倪鴻寶松石圖似獻汝

倪公稍動筆便與世人別觀其作松石古秀蘊精傑體意不可  
竟似以飽霜雪感此撼元風令人坐嗚咽倪公再出山殷勤祝  
其弟委宛奉慈堂丁甯清且細溫樹與鴉羽各復纏心系渡江

初擊檝天果章其義觀其兩屏書一一足百世

端午後別稽山似瀛長觀察

彌月行稽山稽山路相借陰晴時一面溪艇數迴卸親朋寬老  
軀但不撓中夜名園日招訪杯尊環青榭江淮未斷流煙雲足  
呼咤鳧鷖俱泛泛竹葦交狼藉賴有同心人欲結夷吾亞邱報  
日見示相與商微罇溫陶不可呼宗岳久云謝不踐越王薪怒  
發明州駕朝議多元黃水火日薄射縱虎逐林猿吞血爭冷炙  
賢哉賢乎哉夫我則不暇

示諸友

一作書陳天若大易攜事序未有  
咄哉陳子書脩鯁與古汲二句

易理在易簡不從言語入姬孔繫爻象亦非古所急龜龍初負  
圖舉一遂包十纜一著文字頓使鬼神泣一畫十八變天地爲  
噓吸如以九尺杖橫豎自起立日月生其端鬼神步原隰徒就

言語觀如作木偶揖煑石不可餐况復啜其汁

書似倪子新子封兄弟

中身不好道五十稱文章掃筆如落葉無風常自忙晚憶王龍  
門髻年師其鄉出言必定慧置步殊安祥雖如無名公以澹蕩  
自將一一變十年不自畫所長何況生末流顧盼生黃蒼賢者  
滿街衢選人如選羊一語不當心白晝生清光以身入品題眉  
目生痂瘡譬由基殼中百步懸青楊恆不如塞默掩鏡臨幽房  
老來六十年開花爲枯桑每見舊時書當庭陳敝襦恨不斫竹  
杪掃此紛糝糠白髮縈重心退密漸蝓蟻雌烏落其毛似欲爲  
鳳凰及其毳復生依然皂車囊噉然時一鳴瓦礫隨其旁卽如  
孔鷓雉集爲輿隸裝畦頭朝舜英日暮爲元霜所以古至人大  
率皆深藏上者貴無文次者靜以莊神鬼泣蒼書此哭深有當

面壁諸老人豈不避面牆恐有後悔時顛倒無衣裳卽此規矩  
中得其要眇方從繩與屈伸入動無倉擲投之萬舞中可以立  
中央昔吾有畏友辣氣分芥薑大語成鐘鼓小語成笙簧落筆  
不草草艸艸亦芬芳少余一十歲而有千歲強今也亡矣夫顧  
影恆悲傷

秋後至故居過阿舅宅上見海色明淨而阿舅將遂入燕

偶成數韻

海嶺湛清秋小渚涵白澤灝氣識歸帆鯤鵬自促側常懷萬里  
心盪以負山力一鬢暴東洲一羽橫西極徘徊十年間依然見  
人跡抱膝吟介丘中夜歌伏櫪麒麟自鬪爭日月猶爲蝕何況  
令吾曹坐使傷寥歷春風發明河潮水通碣石霓虹垂宛蜒穹  
窿映空碧揮手留餘波猶能蕩八域纓長足自清天高準且直

俯視方壺洲相去千百尺誰復忍居諸俛仰隨增弋

癸丑春渡江出省舊居甫數日生平所愛強半分袂興仲  
猶待僕至心言爲別如復千里言辭不及執手悲猿愴鶴  
何能爲懷燈下作詩擬黃鶴遠別雖非其類情見乎詞矣  
濺草何盤盤不出石流間巖松當危峰往往鳴天寒非不羨所  
居路側輪難寬十指向三峽急欲爲君彈晨風離上枝音多故  
不懽百樂羅上堂總以頽人顏言思千集胸夢寐何能安昔者  
稱交遊日出河星殘愛如飄荷花春如斷雷旛追求無多方徒  
爲除朝餐越雪寄炎南雖淒猶太難况彼長離居一心含萬端  
揮涕與吾言滂瀾不可乾君裳亦吾衣安得比雙翰遠者日以  
疎近者日以單攬佩多傷心所以碎琅玕白雲間山川哀哉何  
時還

贈崑泉浮瑞圖

朱鳥從南翔威毛何繼繼銜來尺素書緣琢如文壘綴以紫流霞藻以青石髓開函視尺書寶氣當胸起上祝岡與陵下祝孫與子入門烹鯉魚清淺堂上水亦有白玉橫宛與璠溪似顧此傾犧尊如躡雲中履我訂東華圖已識君家史告我吹玉笙娛樂盈千紀

小酌高君鼎宅有感

筆研故勞人辭章寡逸致霓虹借日光餓麟自相噬儻莽言千秋久矣非吾志疇昔太史公亦不喜韻事鴻鴈鳴河梁得與遠相棄寂寞元白間誰與辨其是

久謝詩歌見大小杜率爾似之

驕鴻薄四海馴鳥狎葱翠遠近非不分霜羽顧顧頽夙昔耽雕蟲恆言非所貴霞雨襟邪虹信採殊異類猶云蹄翮間未能改毛毳倏忽三十年吐語紛失味謝葉見晨華攬麝急自退漱漱溝水間焉知昔爲累夕秀日已夕老醜空代置見君兩弟兄使人結夢寐

責躬六章

天地何高深日月相循環星宿陳其顛動靜恆無端舉翼不能翔而作醯蟻觀大命一以至不復能研鑽鬼神欲告之翕吸近若難傷哉草木頽不得留朱顏  
姬孔亦勞人心緯何其微馳驅道路間研慮精且希雖非耳目功觸緒知所歸大者接星辰細者呼風雷安有瞞首年棄身忽如違浮雲不可刪日華爲之虧  
顏原在草門餐寢嘗不保金石滿戶庭流徽何浩浩長松蔽霜

雪其下蘊芳草亦有澗底蘭葉萎花逾好君子慎寒凋不為物  
所造屈伸或可偕勿以傷懷抱

逸詩華作  
單可作與

言行生風雲神明喜庸顧造次一以乖日月為嗔怒豈不審厥  
端或以纖忽故規矩天所師平蹙準其度斗柄與河魁硜硜守  
故步才智安所資百草昵霜露

古人不可攀往往稱善卷遽子避國卹季札辭家亂仲尼不之  
非數與相往反以此知師聃龍稱不為嘔哀哉鄙書生窮涉不  
到岸百里已九十遂以委道半

好道不入微閱物不至細影響自相答杳然無所繫大易重存  
身春秋本大義詩人多微思委宛出至意草草一世間遂為穉  
與秕江漢下明河忽已失所恃

辭墓

鬱鬱墓上松青青園中樹之子何所思出門捨之去去之遂二  
年陵更谷亦遷浮雲迷所歸墓草空芊芊禽鳥啼林端婉婉相  
與語幡幡橋大人豈不知道路猿狖離其巢日夕恆悲號廿年  
灑掃心一為虎兕操悠悠泉下人委我如鴻毛

寄友

平生恃良友緩急難相支死者未為歸生者乏其資飄搖形影  
間匆匆重苦離淵嶽旣以翻鱗羽將安之高言不得重微言不  
得隨昔為鳳與麟今為塗與茨白日入虞淵巢鳥安所知君子  
寶其身勿為風雨欺

告兄

鄭白麓本缺此篇  
從石齋逸詩補錄

吾兄七十八已復近大耋相差十六年不得聚一室少小從讀  
書炊爨與負笈老大不相見青雲翳白日兒孫哀我窮相從患



難中出門數丁甯念叔與親同鈞當理其緡射當剋其弓募士  
從其游負戟從其戎俛首思吾兄老得兒孫力安得割所愛使  
我坐感激揮手謝兒曹歸去秋鳥疾兄年日以邁王事日以棘  
勿為復栖栖決肯一歎息

### 誨子

生子不苦晚賢子不苦貧吾年近五十始與兒子親今有四男  
兒庸福誰與倫麀兒年志學雅好似醇篤不器不可雕而當秉  
淵穆麀兒亦清灑每不離膝下與吾命小同但恐讀書寡麀兒  
有雋氣頗已知文字已識吾艱危諒不慕聲勢麀兒在襁褓吾  
猶未得見但能讀吾書卽是展吾面明侯誨諸兒澹泊與甯靜  
吾今所誨爾亦惟愛與敬愛敬與天通一室侔元穹出為四海  
歸入為鄰里宗吾生未能馴勿復談父風

### 自詛

案石齋逸詩作自輓後有識語在尚食監中作與責躬辭墓寄友誨子告兄諸篇相次在末今從之鄭白麓本並實他篇之前非也

燦燦朝陽霞峨峨泰山石瑩瑩七尺劍温温半尺璧化為石板  
宮宛宛置路側漢人一顧問人爲嘆息狐狸踞龍宮蜉蝣噉  
白日蘭膏空自煎瑚璉空自擲妻子不得知親朋爲酸鼻寒從  
孝陵衣飢從孝陵食孝陵何淒淒風雨蔭松栢案逸詩狐狸二句在蘭膏二句前

### 贈呂漢憲

以下附

漢憲本英年所學何精邃拔身入蒼園俯首瞰儕輩貽我四義  
篇居然動明誨其一取威重恐爲溺友累其二取兼善不以獨  
毅貴其三論成人幾欲絕其類其四師文孔稱詩相藉慰感此  
聖賢心誦言悅如醉舉世尙風藻誰別淄澠味君從劉先生湛

然得其粹以爾含璞光拭我溝中淚  
元露下明河蛇蟬自解蛻  
洵矣顏閔儔吾今得所畏

仲馭在茅山風雨夜作因弔前賢得十四哀詩命余記序

聊述所懷以代引跋

二章

桀匠固不同亦貴審所濟  
刀鏡有圓方冰水自通滯  
受命或爾殊風松嗜霜蕙  
當時十餘賢駢躄安可繼  
昔從繆宮詹親覩應山事  
徒手搏羆豺兩臂自中掣  
庭檻不可攀逸圈遂滿噬  
魏顧尸其謀餘宰但微睇  
帝計成奔河崩流倒梁欂  
相憤方就蠲天心已殊  
瘵初念惟涓涓末流破天  
地緬彼汪劉時猶有日晴  
曠如何光華中旁輝改字  
慧百戰洗塵豎儒送獨勢  
縱有丹藥千豈解鳩縷細  
安得平心人一與傷往逝

逝者多可師感歎亦奚爲  
荀爽誠李膺遠害無瑕疵  
延生思遠

甯微妙通元雖曩昔逢廓園  
羈紲渡淮時立馬話漢唐  
痛腹傷繇夷述彼孟博言  
冰涕黏須眉緝騎十數人  
盤鞭及吾縷臨別誦宛鳩  
已矣焉足追綿貞至阜城  
乃爲書見遺云人如干將  
終有缺折期自於同輩中  
荏韞猶如斯况負一世名  
能無千古悲讀之不忍聞  
仰見雲飄馳仲馭且莫哀  
聽吾近日詩木有數頭奴  
桑無十畝絲黃河雖欲清  
龜魚安得知

贈程生

二章

程生有奇製往往凌郊島  
當其得幽雋如出華山道  
翠峯鏡枯崖纖刀剪碧艸  
呼猿集棘端遣鶴上雲表  
三年再相見跳叫忘人老

高寄在白門如隱荒山下  
不逐五侯鯖不繫七貴馬  
得意附往還微元動喑啞  
矯如驚霜鶻拔松拓秋駕  
視彼諸細儒齒欲吐

礫瓦安能復拘拘營肥博笑罵

壽沈母

沈母有令節夙負鸞鸞姿下鳴循高上解佩稱女師翱翔蓬海  
間鐘磬呼朝曦若木生青華結實如星垂銜之哺其雛旁皇帝  
苦飢神人爲指言琅玕方離離鳳葆雖信芬遂亦忘其私雛成  
俯四海顧盼何巍巖搏爲上帝驂步爲仙子騎歛爲紫微方吐  
爲蒼 醫羣真子敢從百族推光儀當時龍根翻素虬驅文鷲  
風雨挾毛鱗顛沛紛鯢鱗猶有鷓雛來百樂供追嬉苦者忘其  
茶甘者忘其飴艸木縈巖阿一一成靈芝惠光照日月香氣生  
瑤墀鴻涯奏清曲王魏呈妙辭人間錦繡章河漢天孫綵下裳  
組以綵上裳繪以絺應龍與共翔八極相追隨邈矣飛黃翮矯  
然吉量馳塵海有飛蹄嗟嗟安所知

壽邵母爲旭如尊人

蘭蕙非不芳所爲少筠節脩篁亦森然安得滋香烈敬爾吳氏  
母檀塵薦翠雪矢口得清韻操躬獨貞潔一如琪樹中裛露酬  
明月邵翁老負僑唾壺每爲缺俛首視幽閨輒爲解憂悒惠連  
旣少孤道韞亦晚訣上有垂白親下有銜哺血啟帳留墨光下  
漿餘能彙不以異胞乳而爲隔膚髮古人親女師縱冤飭巾櫛  
亦云禮宗者軒輪生羅幃此豈其流亞翼燕表貽厥旭如從吾  
游文采方嶷嶷有弟如士龍亦與麟鸞悅嬉戲當母前藹如雙  
髻爰天道衛貞盧人道寶慈闈覽諸古賢媛若箇羸後達絺綌  
畫山龍其始於覃葛袞繡成三纁母乃感綿葛琥珀生巖阿豈  
必松所結鴿鷁託明丘亦本於丹穴奉七念邵翁燭背煩荀熱  
仰睇聞黃鵠俯睇聞青蚶十載糲飯羹昨欲下瓊屑蓬蓬六幅

被首自裹袍第甘露湛慈柯竹栢同縹緲獨蓼蕭詩可以頌  
伯竭顧盼婺雲間惠風來珠翟

澹廬口占

我自用我澹吾亦愛吾廬無有了吾我好豈關詩書不過此兩  
句百歲行趑趄靜觀萬物中本一無二殊澹既無所著廬亦還  
空虛譬如我與吾對炤難相如有時負陰陽形影不能俱况行  
彼世中兩兩分眷須一有吾我心陸帆而水車兒子自謠歌筆  
楮自分區當其適意時亦自爲詩書要知吾無澹猶之天無廬  
及於羲畫前初無詩與書此意近禪門萬勿云起予

偶書

从自書  
軸輻增

舊花如不妍新花豈更好舊實如不堅新實豈更老所遇皆故  
物翻然費大造體道苦已忘聞道苦已蚤逐氣爲物吹何以殊

百卅

雲霄同知青浦陸我嵩校字  
同安訓導臺灣陳震耀

權自久區嘗其過意時亦自得其意長知吾無濼猶之天無廬  
及於義畫前初無前與書此志遠應隨再勿云起子

偶書外自書

舊如不妍新花豈更好舊實如不堅新實豈更老所遇皆故  
猶然費大造豐道苦已忘聞道苦已登逐氣為物吹何以殊

